

焦太史編輯國朝獻徵錄

鮑太史編輯國朝獻徵錄卷之六十八目錄

大理寺

掌寺事尚書

楊守隨

卿

虞謙

王宇

王霽

田景暘

李忠

陳珂

恪

湯沐

葛浩

王縱

胡岳

汪文盛

李珏

李香

余胤緒

張夢鯉

張鹵

宋儀望

少卿

胡閔

薛崑

傅啟讓

沈粲

仰宗泰

李奎

徐正

李茂

劉慶

董怡

羅輅

商爲正

寺丞

鄒瑾 一作公瑾

劉端

王高

彭與明 一作民

孫珂

汪淵

周鳳鳴

張鵬

成守節

丁三

笨

副

王敬

李芳

李公輔

金陵黃應登

全枝

吳興茅元儀

錢塘徐象揆

刊行

目錄終

焦太史編輯國朝獻徵錄卷之六十八

大理寺

掌大理寺事工部尚書楊守隨傳

掌大理寺事工部尚書楊守隨字維貞浙江鄞縣人
成化丙戌進士授江西道監察御史庚子陞應天府
府丞丁未調南寧府知府弘治戊申陞應天府府尹
已丑調廣西布政司右叅政甲寅陞廣西按察使乙
卯陞南京都察院右僉都御史提督操江丙辰陞南
京大理寺卿庚申改大理寺卿乙丑以九載考績陞
工部尚書仍掌大理寺事正德丙寅致仕正德十五

年六月卒賜祭葬贈太子少保諡康簡守隨爲人敦樸少諛易學與從兄吏部侍郎守陳從弟南京吏部侍郎守陞相砥礪雅有士望居官剛直建白甚多遇事無所顧忌爲御史時嘗按賊吏李孜省罪及孜省以左道得進遂調南寧爲府尹時嘗按太監蔣琮罪爲所中遂調廣西爲大理時嘗偕三法司讞太監張瑜獄抗衆杖之必欲盡法與內意忤遂致仕未復爲劉瑾所構繫獄凡八年罰粟凡千石守隨素清慎家至屢空而其心裕如也

嘉議大夫大理寺卿金壇虞公謙墓碑

楊士奇

公諱謙字伯益姓虞氏虞之先家河南陳留代有仕籍宋諱南者從宋南渡遂家金壇世業詩書南六世至文寶生仲仁公祖也祖母徐父德華母周以公貴祖父皆贈嘉議大夫大理寺卿祖母母皆贈淑人公自幼秀朗端重異常兒聰敏好學洪武乙亥由太學生擢刑部山東司郎中授奉議大夫陞杭州知府授中順大夫 太宗皇帝入正大統召爲大理寺左少卿授中憲大夫永樂己丑車駕巡北京時 仁宗皇

帝監國奏陞都察院左副都御史授嘉議大夫甲辰
轉大理卿公自少壯有志世用既仕恪勤夙夜務盡
職分持大體恒曰爲臣之道愛君愛民二者愛君崇
其德愛民厚其生初爲郎中已駸駸起時譽在杭州
嘗建議僧道民之蠹今江南寺院多者或數百頃而
官府徭役未嘗及之貧民無田往往爲徭役所困請
爲定制僧道每人田無過五畝餘田以均貧民初是
之已而謂非舊制遂寢陞大理寺卿都察院論誑騙
准洪武榜例梟首示衆公奏言比奉詔書自今准律
斷罪誑騙在律當杖而流梟首非詔書意 上曰處

謙言是竟從律天津衛倉災焚糧數十萬事聞遣御史廉視言主者盜用多故縱火以自蓋追逮幾八百人不勝考掠皆誣服應死者百餘人餘坐徒流察其冤卒白於上得減論於兩法司具獄及四方所上獄議必親閱之必當必平於大辟罪尤加意曰彼無憾斯我無憾矣為都御史嘗奉命巡視揚州淮安州旱災至則疏民所苦請發廩賑貸又請官贖還所賣男女為奴婢者皆從之又奉命督兩浙蘇松諸郡通賦輸南北京及徐州淮安先是富民賄有司率得近地而貧民多運北京公建議為四等丁多而糧最

少運北京丁多而糧次者運徐州丁糧俱中運南京
淮安丁少而糧多存留本郡縣倉又言兩京往來官
員軍民商旅舟聚徐州呂梁二洪動一二月不能進
者請每洪增夫二百人協力挽送如例給月糧仍官
撥牛每洪一百分畜近洪民家閒暇聽民以耕大舟
行則用挽之亦皆從之又督運木道潁州陽武陸行
下衛以達北京所督軍萬餘公節其力而厚撫之人
不言勞會夏暑疫役者多病公曰此舉之過密宜疏
暢之速命散處之病者悉起奉命巡撫浙江察廉糾
貪用建議便民十數事多見施行 仁宗皇帝嗣位

於刑獄尤隆欽恤而嚴大理之選曰是天下之平也
於是大理寺卿闕遂改公爲卿時有詔求育公上育
七事其一用人曰用得其人則治道興非其人則治
道廢人主之職惟在擇人而已二興學校曰教育之
道本於師範今內而祭酒司業外而郡縣學官不在
於備而在得人庶有成效三曰都察院耳目綱紀之
職用以激濁揚清雪理冤抑今專俾治獄非朝廷設
風紀本意四曰廣儲蓄今國用空乏宜預爲備五曰
北京八府之民困於養馬極矣宜分給無馬郡縣牧
養以蘇畿內六曰鈔法不通其弊原於出多而人少

今但多方收之而不輕出民艱得鈔則自流通七日
京師盜賊之繁由軍民雜處官司不便管束鄰里不
相通如今固不能遽釐正之宜勅五城兵馬司於各
坊街巷不分軍民工匠每十家編爲一甲使互相覺
察出入一家有犯十家連坐有能捕首免其連坐之
罪庶輦轂之下可以肅清皆切中時務蓋公於爲臣
必思盡其所當然者一日朝還得風疾上命醫往
視賜藥歷半歲竟不起宣德二年三月廿四日也卽
罔賜祭給舟還其喪命有司治墳其生以丙午歲正
月二日享年六十有二其居家善事父母父母歿喪

祭咸盡禮於其弟友愛與人處溫恭怡怡其儀觀偉
然風采凝潔瀟灑絕俗也以詩名於時所著有玉雪
齋稿若干卷喜寫山水木石幽澹簡遠有倪雲林相
致嗜善法書名畫邂逅心之所好輒贈不靳

通議大夫大理寺卿王公宇墓表 李 野

公諱字宇仲宏別號厚齋河南祥符人曾大父汝水
隱居不仕大父友德父希哲俱以公貴贈通議大夫
大理寺卿母丁氏封淑人公自幼穎秀異於羣兒父
母獨鍾愛之童州時從師受業日記萬言巡撫侍郎
于謙一見之曰此遠大器也卽遣爲邑庠生正統戊
午遂登解鄉闈明年登進士第擢南京戶部主事刻
華稍弊廉能之聲大振都憲周銓時總京儲篋視屬
吏見公獨敬愛之三載以績最進階承德郎公益砥
礪名節在郎署中特立獨行不顧流俗時郎佐秩滿

例轉正郎吏部以公才能顯著薦陞江西撫州知府
是郡地儉民夥業號難治公至以簡御煩闔郡翕然
稱頌里有隱士吳與弼以道自高足迹不至城府公
欲往造其廬與弼聞之卽先詣府謁拜接談竟日乃
與曰真明府也公益勞心民事凡漁利害民之弊
罷之吏有奸黠者盜府金自若公廉得其狀置於法
衆皆畏服以爲神明撫民多商給之錢歲計累萬前
守皆自取以爲當然公曰可以勿取而取之是傷廉
也悉以屬官郡治傍有穴地前守引水畜魚以自給
公以土實之爲倉儲粟數萬石以濟饑民郡人題其

壁有關節一毫無地入公廉兩字有天知之句遠邇
傳誦宜黃多山虎爲患公爲文告神而驅之虎皆遁
去金谿有聚衆暴掠者公曰此吾良民迫於饑餒故
耳卽開倉濟之衆皆感泣曰真吾父也卽時散去藩
臬曹公績曰剽繁治劇才識有餘清白操持纖毫無
玷都憲巡撫者上公治行於朝特賜誥命以旌異之
進階中憲大夫天順改元 皇上復位首念方岳重
臣爲郡邑表率屬廷臣會薦公在首選遂陞山東右
布政使時廷議山東累歲不登民皆流移必屬能者
撫安之 上以璽書托公凡賑濟之策不遺餘力民

賴全活者數十萬人明年上念宣府北邊重地宜

得憲臣巡撫遂召公爲都察院右副都御史以往公

至訓練士卒堅完城堡凡芻粟屯田邊備戎務一切

便宜處之剗弊刈奸士卒感恩而權貴則不悅矣賴

上知公爲人譖毀不行未幾兼巡撫大同時石京

與其姪彪皆驟遷高爵恃寵自肆而大同乃舊鎮之

地索取尤橫衆莫敢撻公獨上章劾之以爲大蠹大

奸莫甚於此乞置於法以消未形之患詞氣剗切聞

者嘆服已而亨彪果以奸敗朝廷益嘉公忠直庚辰

丁內艱還家一年上起復公至京將有南臺之命

忽大理卿缺員持天下之平者無踰於公遂以命之
累章懇乞終制弗獲在任惟以洗冤澤物爲心清研
獄狀務得其情不知案牘之勞形也癸未春進階通
議大夫公質幹奇偉心性剛介慎廉隅重名節操履
端方確乎不可拔事親盡孝處兄弟篤於友愛自奉
甚薄雖居顯貴服食不異寒士視貨財如汙穢見不
廉者若將浼已避而遠之卒之日囊篋罄然無以爲
歆 上聞訃惻然傷悼曰可惜佳士遣官諭祭其家
復令有司督葬事

大理寺卿王霽傳

實錄

大理寺卿王霽字景明直隸上海縣人天順四年進士拜南京刑部主事遷員外郎再遷郎中累辯疑獄有能聲遷黃州府知府嘗有虎害火災又江水嘗暴至懷民廬舍霽祈祝有應以是民愛信之遷廣西參政未幾遷江西按察使進太僕寺卿時馬政廢弛霽條陳十事奏行之宿弊爲之一革用薦遂遷僉都御史巡撫山東值歲饑民多死徙霽爲區畫銀五十餘萬兩米二百萬石賑之存活者甚衆召拜大理寺卿稱用法平易弘治九年九月卒賜祭葬如例霽務爲

和厚所與更無不得其歡心雖與隸輩亦鮮有怨之
者故歷官中外三十餘年所至皆因以得美譽云

大理寺卿田景賜傳

實錄

大理寺卿田景賜字時中保定高陽人登景泰甲戌
進士授山東道監察御史陞大理寺丞累陞左右少
卿進本寺卿成化乙巳致仕歸景賜爲人峭直精敏
有幹局爲御史甚著風裁按治所至貪墨多斂迹推
掌三法司事彈劾無所避在大理持法不撓詳讞平
允後因子無行自度戒不能悛陰使人殺之事浸露
景賜懼遂引疾去時年五十九在林下餘二十年正
德元年正月卒

通議大夫大理寺卿贈刑部尚書燕公忠墓志

銘

楊一清

子讀宋史見所載名臣如包希仁之峭介關節不及其門趙閱道之廉直爲御史糾彈無所避入蜀以琴瑟自隨嘆曰爲人臣者當如是其在我國朝若太康顧公之總內臺正色直道後鮮克儷近時仕者守不勝才通常掩正軟美循默之俗相習而不知戒嗚呼此燕公之所以賢於人而其死爲可惜也夫公名忠良臣其字別號西谿起成化甲辰進士丙午授常州府推官歸守內艱服除改寧國府兩郡故多矣有莫

敢窺其庭戶凡所讞獄多平反民某買於江淮間其
僕偶有過被笞怨家嗾之曰汝爲彼服務尚汝笞不
汝瓜汝復何恃盍爲汝圖之遂與僕殺其主於采石
因盜其貨惣於官罪人久不得公廉得其情捕而鞫
之遂伏辜郡大旱承檄發官廩賑卹多所全活弘治
甲寅被徵爲福建道監察御史歸守外艱戊午服除
改浙江道以災異陳親賢納諫重名器節財用嚴賞
賈諸事言甚剴切 孝廟嘉納之庚申出按陝西力
舉急度風聲凜凜雖方岳重臣未假以辭色周歷郡
縣不憚險遠賊吏望風多解印綬去諸司有過輒惕

然曰恐巡按知之民有不得其平者則曰吾將訴諸御史執政者有所親厚被摧折乃病其苛察壬戌遷陝西按察副使整飭環慶兵備至則留心戎務日訓練防禦不少懈虜入罔害是時予受命修舉馬政始建議以藩臬之賢者補卿寺官正德丙寅吏部推薦爲陝西苑馬寺卿至又留心牧政馬用蕃息戊辰擢陝西按察使發奸慝伏如巡按時禁和買之弊裁省里甲支費三之一庚午進左布政使以簡靜爲治往時公罰聚斂以給用使因自封殖至是一切禁絕瑾賊方柄國附者瀾倒陝固鄉土所尤屬意公獨無債

還干謁瑾雖銜之卒莫能害也寧夏變作經畫軍餉
食足而民不勞予起廢西征相見慰之曰別昔數年
此何等時也風操尚爾耶比還朝遂特疏薦之辛未
擢都察院右副都御史巡撫宣府軍政一新是年冬
改大理寺卿執三尺惟謹不肯少有推移貴近有所
請托必正色拒之知州田崑爲人所訟上怒其不
敬將寘重典公屢疏雪其誣竟得釋有胡某者烝父
妾因毒殺父行厚賂祈脫免所司緩其獄公曰罪孰
大於此牒至輒駁之屢牒屢駁會奉使江西而止江
西藩臬官交惡相奏訐致興大獄久不決公受勃往

獄成無異言屬歲饑民重困再授勅賑濟驗丁口給
粟民賴以不死甲戌滿三載奏績得推恩賜誥命仍
歷其子爲太學生初吏部擬薦公爲吏侍及兵侍皆
不報或諷使少貶以求進公曰大臣進退當以正求
而得之人將謂何竟不及再命而卒性狷介峭直居
常寡言笑不輕交際人望而畏之有包趙之風焉自
奉伯約在仕途三十年祿入僅供朝夕田園邸舍無
所增置卒之日囊無餘蓄訃聞上遣官諭祭命有
司替葬事吏部奏公剛正得大臣體法應贈典報可
贈刑部尚書蓋異恩也生天順己卯八月五日其卒

以正德乙亥正月七日壽五十有七

大理寺卿東瀛陳公珂墓志銘

何詔

嘉靖辛卯秋九月朔大理寺卿陳公卒訃聞遣官諭
祭營葬公諱珂字希白別號東瀛曾祖榮甫祖思誠
考昱累贈奉政大夫母朱氏贈宜人公性至孝友伯
仲五人日侍父母養聚首一堂怡怡無間言成化甲
午補郡庠弟子員庚子以易領鄉薦弘治庚戌登進
士第公念母年高乞恩歸省五閱月母沒居廬三年
癸丑授刑部四川司主事奉勅錄囚南畿御史樊臚
知府程濂故出重囚公劾之皆得譴還朝陞本部員
外郎榮王啟封國於湖南陞公工部營繕郎中甫其

後既至潘博士夔相地當徙民民不適有居公多方處分不失其所民安而事集辛酉轉刑部郎中河間密邇京畿繁劇難治大司馬白康敏公舉公出守公至去苛削之文斥乾沒之吏先是山水衝決民蕩折離居公思所以還定之攢木畚土斃石爲隄六十餘里水安故流民復業者四萬餘口時又值亢旱公徒跣禱於山川雨如注冬無雪傷麥復禱輒應麥有秋獻縣民李政訴盜殺其叔李文子林劉信妻亦訴盜殺其夫公謂安陵諱辨刑礪工邪牒於城隍是夜夢雌狐臥繡帷中起首指徨徨欲言公寐召林妻宿錦

鞠之得其情捕盜劉永王幹及李政劉氏俱坐謀殺
死吳鑑坐強盜死圍郡稱爲神明巡按御史李璽奏
聞於朝銓部亦以課當最擢福建左叅政遷按察使
時內使陶錦怙勢張皇公正色危言無所諱陶亦自
戢不敢恣睢逆瑾用事遣御史捕鹽徒盜賊甚汎濫
公亦屢與之抗民賴以安陞右布政使武平大帽山
鯨賊猾賊爲公便宜發帑中錢具糗糧芻茭給官軍賊
就戮轉左布政使設賑貸之法定徭役之條寬舶商
俟粟之征建通濟橋七十餘洞民咸利之決期陞都
察院右副都御史巡撫河南去後常見思乃爲建生

風尸祝公又援借寇故事立四借亭於通衢以此甘
棠見素林公紀其事甚悉嗚呼公何得民之深如是
也其惠撫河南適流賊之餘邑里無儲峙賊黨暴掠
等尚爲民梗公首命兵勦平之仍命有司收瘞餘骸
勒石表男女死節者又申寃獄知縣袁鑑捐俸築草
等五十餘員俱附奏請得麗末減新野縣當荆襄之
衝內官私置抽分廠漁獵民公檄守巡官毀之罪其
導爲者汴泗東南河嘗決歲徵修河夫寬剩錢公議
河決不常可緩歲所徵以與民民力稍紓正德九年
春二月沔池縣河清二百餘里公具疏以聞因言宜

迪德祇承休命 帝曰俞十年入爲大理卿保定民
吳澤詐稱觀音現夢佑澤後當大貴弟海復傳播以
誑愚民律臣朱寧詞得之差官杖撻澤等二百餘人
以謀反聞刑部送澤等至大理寺復審公駁議止坐
澤妖言海用傳妖言律斬餘從寬貸具列上 帝竟
俞公議是年以論免歸公駁歷中外三紀章疏無慮
數十餘大約皆經世大猷發先賢遺意其陳應議六
事曰均田賦以平穀祿曰便折納以蘇民困曰省征
斂以厚民生曰清稅糧以寬逋負曰致刑辟以章憲
法曰謹作養以重世廕其陳贊畫安邊大計三曰制

勝曰教勝曰器勝頗見施行其論河南平原野戰以
車爲主宜倣古魚麗偏箱之法番長於馬漢長於車
宜各任所長時未及用識者趨之所著有武經發揮
孫子斷註行於世及東瀛集九溪吟藁奏議若干卷
藏於家

大理寺卿陳恪傳

實錄

大理寺卿陳恪字克謹浙江歸安縣人成化丁未進士授宿松知縣擢監察御史江西按察副使整飭南贛等處兵備正德初逆瑾用事以冗員例革尋復以爲御史時事株連削藉瑾敗復起爲貴州副使提督威濟等處兵備陞貴州按察使山東右布政使河南左布政使改江西時方朝覲吏部奏旌天下能吏恪爲首尋陞右副都御史巡撫南贛汀漳諸郡改大理寺卿正德十三年四月卒賜祭葬如制

大理寺卿沂樂湯公沐傳

張一璧

沂樂公者常州江陰人也姓湯氏諱沐字新之大夫諱縉父諱虞號厚菴以公貴俱贈通議大夫都察院右副都御史公髫髻卽警敏甫冠爲諸生博聞強記名歛起乃輪秀於鄉遂高薦時成化丙午也弘治丙辰舉進士試政戶部監太倉大司農甚善之丁巳出知崇德崇德政積弛公至則裁決無留務日廉問民間利害罷行之流愛於人人爲立生祠祀公居三年甯道上公治狀徵拜山東道監察御史奉命巡內帑毋殺督河東鹽池弊端多所釐革繼按山西劾賊吏

振士風郡縣官望風信伏正德戊辰擢湖廣按察司
僉事公受命取道過家展墓而論官武義命且下矣
乃時逆瑾竊政銜公清不染俗勇不避難剛不徇物
介不趨時遂見忤有茲謫云公至武義如在崇德時
有流愛馮庚午瑾敗伏誅詔伏起公廣東按察僉事
兼督屯田繼政先是奸貪在位多蠹政公極力汰除
不遺餘力政聲播聞壬申遷福建按察司副使明年
入覲時違卷楊公爲冢宰最嚴吏治乃應詔薦天下
諸司才堪公輔者僅十六人公與焉 上賜綵幣羊
酒示褒顯云尋轉江西按察使乙亥擢浙江右布政

丁丑轉廣東左布政使會 今上入繼大統陞都
院右副都御史巡撫貴州癸未改巡撫四川其在
浙江毛九寇孝豐在四川芒部寇松藩公率衆平之
上嘉乃績有白金文綺之賜故望益隆赫凡兩京
部院卿佐缺員必首薦公乃乙酉徵拜大理寺卿公
素修謹至則凡所審鞠志在奉公嘗語僚屬曰法者
天下之公苟惟意輕重非示天下以公也又曰因情
求法故有不可入之刑移情合法則無不可加之罪
未幾有五臺山人罹重法者父子當殊死訟詣京師
上下諸司覆訊公三奉讞忤 上意乃與顏尚書

國壽等並坐免官歸始公入長大理受 上春知年
竹經筵數資賞及上方御書公益感激圖報乃不成
禍與機會竟緣是去惜哉公歸江陰城南有故田廬
督耕自給且爲國蒔菊數百本花時延客宴賞其中
又聞與者碩爲鄉會取適性坦率不爲鈞距見賢者
愛之不啻已出尤善汲引後進居嘗慕浴沂黜也之
風故號沂樂以見志平生孝友天至雖其先人早逝
然歲時廟祀孝敬不衰撫其弟汭極親愛歷官清白
歿之日家無餘財生天順庚辰十一月卒嘉靖壬辰
八月得年七十有三

大理寺卿贈刑部右侍郎葛公浩墓志

瞿景淳

公諱浩字天宏敏而嗜學弘治己酉以禮經高等領
鄉薦丙辰登進士第初授五河令五河故小邑時復
傷旱澇公省科役賑貧窮流民知歸遂爲完邑復中
學政以身爲師羣士靡然向風在任五年以考最勅
進階馳封壬戌召爲南京廣西道監察御史會災異
卽上疏請正心術信命令選憲臣慎考官處輸納嚴
武備重刑憲設險要劾戶書某貪鄙請置之法 孝
原上府請正侍醫劉文泰之罪連及中官 武廟初

教坊請選取樂工公以教坊非先王之樂諒除非樂之期手疏止之時逆瑾弄權公率同僚論斥之以正國法疏入下公錦衣獄杖黜爲民瑾復摘以他事下公南錦衣當是時公蓋幾不免而意氣自若也後瑾誅起公知邵武府公至則與屬邑裁濶狹貞賦代俗故尚巫男女聚會無別公下令禁止民有兄弟訟者公諭以倫理至情對之洒淚兄弟立感泣讎所爭而退越甲戌應朝奉詔陳利弊乃請通融里甲平處徭役均派解戶改編馬夫清理漁課嚴禁幼昏事皆施行在郡六年民多歌之誥進階加封丁丑冬公連

遭父母喪時已晉河南叅政服闋改授廣東新會定
作諷者以縣治孤危恐先碎賊手公潛師趨賊不意
縛其渠魁脅從多得減死賊遂以平詔賜白金文綺
乙酉晉雲南按察使持法不阿嘗會論囚巡按某欲
出一人公以法爭之不爲出中官某縱下擾民公一
裁以法境內肅然丙戌進廣東右布政使與左使梁
公協恭宣化利濟居多丁亥擢貴州左轄隨召入爲
南京太僕寺卿戊子晉南京大理寺卿論用方切而
公乃引年復以災異自陳上皆不允尋召改北公
自有大理慎測情罪廷中稱平上親郊有犯蹕者

下法可欲置重典公奏罪不至死遂得未減 上以
體成推恩公遂得進階封三代如制云既以舊德連
用然不能俯仰諧俗懼不能安會雷震午門西樓公
自陳不職乃得旨致仕時辛卯夏也公既退杜門不
出惟歲時朝賀則一詣縣行禮天性孝友在郡武時
于木舉進士卽圖歸養父聞之詒書戒以報國乃不
敢言歸後居母憂悲哀不少忘以昆季居朝夕相與
惟知也居常無他嗜好惟以文籍自娛精神故舊有
頌其德者輒謝不敢當生平恥言人過至居臺中則
數抗疏論切大體直聲凜然爲郡邑時繩墨不敢失

尺寸及論犯蹕乃能引去以諍爲國司平公於是加
人一等矣于木丁丑進士仕至山西叅政朝議錄公
然乃贈刑部右侍郎以嘉靖癸丑十二月初一日勅
葬公十都方山之原賜祭一壇

通議大夫大理寺卿龍湫王公綖墓志銘

韓邦奇

公開人也性貞廉介直正德初開守不理於多口時
通大明黜陟苑洛韓邦奇爲考功員外郎太宰以守
治狀不飾論考功詢之多士皆如太宰言然考功素
知守才疑之往問焉公當飯客考功故久不起公曰
吾當飯客考功請同之公辭不可曰安有戶曹主事
可食而吏曹員外郎不可乎乃出一盂糲食二豆蔬
共食之客去考功以開守問公徐曰開之士大夫皆
曰守治開無狀民則皆謂守良守後得不出考功以

公遵象持公議草具待賓戚獨立佳士也遂定交云
公諱緹字遂伯別號龍湫王氏之先本鳳陽人始祖
玉洪武初避兵於開之別駕里遂爲開州人玉生嗣
榮福榮生貴貴生溥陽曲縣丞始封承德郎戶部主
事繼贈通議大夫右副都御史配牛始封安人繼贈
淑人生公公童時莊重不羣少長卽知敏學伯右布
政每見而喜曰昌吾宗者此子也弱冠中弘治戊午
鄉試春試不第卒業大學先後所交如浚川王公後
渠崔公蒼谷王公有涯孟公皆海內名士乙丑登進
士授戶部主事是歲夏惟恩贈翁及牛淑人皆與封

尋陞本部員外郎累擢中時權瑾用事羣閣倚勢請
託公不顧未幾贈翁卒於官邸公哀毀如不欲生扶
柩還葬服闋陞河南衛輝知府公振舉宿廢屏除積
奸公移滿案兩造盈庭從容詳處皆中情理儒學諸
生季必嚴試重行賞罰皆始恕而終服丙子當鄉試
監臨東塘毛公以公有文望辟外簾錄文多出公手
毛公喜曰中州之錄可以式矣特疏薦曰知府學問
深邃可學校憲職丁丑當考績時歲荒歉撫按以公
素得人心留以撫之又二年遷湖廣副使初衛輝爲
水陸南北通衢臺省權貨過者連車接轎公惟庭見

一揖耳人固素知公亦不深尤也至湖廣遭 武廟
崩天羣臣奉 皇太后旨迎 今上嗣統巨闕谷大
用者八黨之一亦在迎侍中強公長跪公不屈肆行
忤侮公脫冠裂服奔赴王府伏啟王深慰答之而公
卽棄官歸 今上登極公上疏奏劾大用奸惡辭甚
激切凡五上而大用斥矣尋起復河南鎮寇王鏊橫
行河朔間公討平之總督奏言副使累經戰陣親冒
矢石故致克捷癸未陞山西右叅政時巨寇黃大寶
標掠殺戮流毒郡邑公擒之當道累疏薦叅政願收
屬門行太僕卿公乃乞歸疏凡三上始得允銓部覆

奏謂公有冰蘖之操州守朱君喜其名曰冰檠己丑
黃起四川左布政使士蕃芒部讐殺累年公以恩信
諭平之會牛淑人疾卽具疏乞歸鎮巡僚友懇留弗
顧此泊廣都而淑人卒壬辰春起江西甲午陞都察
院右副都御史巡撫本省地方以恩詔階通議大夫
贈翁牛淑人皆獲贈子行恕廕入太學公撫江西督
通欠清詞訟禁侈俗理陂塘恤民瘼事關藩臬符驗
頗犯衆怒亦舉行之大者上聞乙未擢大理卿大理
自正德以來避部院尊要久失叅駁之職公力舉行
之由是衆情不堪私比者多不便左遷山東叅政蒞

任疾作乞休不允部移慰留而疾愈甚疏再具未上而公卒矣公入仕來凡四里居耕田讀書絕不干謁有司曲加敬重其取與進退大節無毫髮苟可以對越神明日用居處蕭蕭如寒士平生雖好爲詩文然多不存稿卒後行恕訪之親友僅得三百餘篇痛兄氏早亡撫諸孤若子先世所遺產盡以畀之生成化丁酉卒嘉靖丁酉年六十一歲有司延其主祀於鄉賢祠云

通議大夫大理寺卿浦南胡公岳墓志銘

徐階

我皇上受命中興羣賢景附於時有宣力任事之臣
曰華亭浦南胡公諱岳字仲申起家刑部主事歷員
外郎四川按察僉事湖廣副使廣西右叅政福建按
察使江西廣西右布政使江西左布政使擢都察院
右副都御史巡撫江西改大理卿未上卒公爲人以
氣節勲業自許事至能立斷爲刑部時慮囚鳳陽大
姁甲者與乙爭田鬪不勝因殺叔誣之獄具憚莫敢
決至公乃決上之卽位懋遷藩臬大吏興闢化理

以公爲才遷四川芒部寇川南公當分建會病瘼更
川西奮曰人固有死必川南邪卽督兵入其山斬木
通道二百里募死士塞賊走路大合兵搗之誅若降
若干人捷聞賜白金文綺松潘兵備副使遷東路者
曰是重地且其政廢久非胡某不可使攝胥檄公公
往覈戎籍實庾廩屬侵尅之罰卒以月餉質富室計
其息及十三爲取券焚之居數月粟餘於廩人有餘
力繕甲仗營堡關梁事改於舊諸夷也焉總憲於國
數據法直民死罪按賊吏不以御史意假貸語時譏
御史御史至面發赤乃止閱故牘得事之未報者長

一郡縣盡閩之屬檄日常八九至吏傳爲不能給
公聽讞乃恒有暇手校四書五經及晦菴先生集
粹以傳江西吏巧文而輕犯法爲置簿書勾稽以
時違視廣聽奸至卽發問以禮規御史御史怒公不
爲撓曰吾務盡其在我者治事如初至疾病猶扶掖
以出御史竟不能有加後至者以績聞拜中丞公益
自奮首爲書數千言徧以授羣吏已乃汰冗費更役
法民視產出錢歲不過十一役於官有常期榜懸籍
刻吏無得動郊廟建詔市材楚蜀吏盜官錢吏賦民
或張旗幟擊鼓伐金從徒百餘行視民所植出黃紙

封之縛其主怖曰當自輸京師民號泣致厚贖乃免
公嚴爲禁楚人賴以安歲饑手疏以請上爲減所
輸全活甚衆公既勤於政疾復作迨被徵已艱於行
會聞繼母喪自江西歸其家踰月逃卒公平生於財
廉所至未嘗市民一物其與人處言笑歡謔洞然不
疑然或以不義攫之輒詬怒已又輒霽嘗而折人之
過悶者震懼不能勝及論薦人才終不沒其善交游
姻故雖在寒賤拯援周卹必盡其情然不可干以私
故賢者服其誼不肖者忘其怨宣力任事初若不宥
於俗而卒成其名致位通顯蓋非獨所遭際爲然生

成化甲午正月卒嘉靖己亥五月年六十有六

汪文盛傳

廖道南

汪文盛字希周崇陽人父藻爲邑庠弟子員生文盛於學舍穎靈不凡少長肆力於學與兄文明夙夜靡益友愛篤至正德庚午鄉薦辛未進士授饒州府推官時宗藩驕恣悉繩以法構誣逮繫日從狴犴中翻春秋三傳著爲辯說根究理要卒賴廷論白其枉釋之還治適姚源寇起蹂躪德興都御史俞諫陳金檄住視師文盛單騎奮慨悉心規畫多中機宜秩滿召入爲兵部武選主事值佞倖錢寧江彬盛感上志誘學南征文盛率同官諫沮械杖於廷濱死者數

本上入統大統權爲車駕郎中命偕都給事中夏言
御史鄭本公清查冗員獨裁抑璫戒鴻濬天魁羣奸
屏息出守福州府首建三山書院以樹標準導梓南
漢緒史以崇體要而又構羅一峰祠以昭特行表鄭
少谷墓以彰幽履濬上王港以資灌溉罷閩越不經
之祀省靈濟無益之費築羅源諸邑之城處琉球諸
國之貢聞人德之尋母愛歸服闋還浙江按察副使
提督學政肇闢文公正學以闢異論次防天真書院
以育俊髦而又謁白傳坡翁之祠以振高蹈甲武穆
忠愍之墓以慰忠魂瀛龍門以釋何王金許之楮牒

大台以紹劉宋王方之踪禁西湖冶遊以屏侈靡
東湖鄉約以敦俗尚浙人稱之未幾以父憂歸服闋
復補陝西督學甫校士於西安而滇廉訪之命至矣
時文人內訌莫登庸竊據篡奪其子方盈稱兵窺伺
陳棕黎寧播遷赴愬炎驕驛騷靡有寧宇上赫然
震怒特晉文盛爲僉都御史保釐南詔用邊蠻方乃
諭八寨宣布恩威乃詰五邦選厲鋒銳檄留老嫗俸
附之光紹招納瓊崖輸款之才族於是武文淵獻其
地圖武嚴威列其陣法儼承恩贊其闡謀能夙翔呈
其籌畧陶仙阮仁祐輩恢復爭先阮堪范正毅等投

降恐後刁斗宵鳴於紅衣之寨烽火風燭於蓮華之
灘水截鯨鯢陸剝犀象花涉廻淵高良失險方盈投
賊福海枕魄 上遣咸寧侯仇鸞兵部尚書毛伯溫
受其降璽書褒寵賜以金綺有差乃陟爲大理卿進
疾歸卒 上賜祭葬所著有白泉文集姪宗元字子
允巳丑進士太僕少卿宗凱字子才壬辰進士工部
郎中所後宗伊字子衡解元進士初任浮梁令宗召
鄉薦

嘉議大夫大理寺卿後菴李公珏墓志銘

許成名

聖天子嗣大歷服之二十八年十一月二十九日大
理卿李公致政卒於家訃聞 天子悼焉念公資勞
遣官賜祭移鏹調庸治其勞功蓋自我 皇上欽崇
典章褒表勲舊近代九卿得此惟艱若公者可謂人
臣有終矣公諱珏字廷重別號後菴世爲開人高祖
諱山曾祖諱寬祖諱敬父諱成代有隱德俱不仕成
以公顯贈承德郎刑部主事成娶吳氏繼孫氏再繼
張氏孫實生公孫卒公甫四歲斃然孑立鮮伯叔兄

第張性嚴公事之能盡其孝張撫公亦不膏已出遂以慈母名公生而嶷然聰明穎悟年十八入郡庠池陽李公嘉祥守開見公所爲文曰此公輔器也深重之弘治領鄉薦乙丑登進士第時以李公爲知人初授長洲縣知縣公年二十有五剪剔吏蠹聽斷詳明遠邇至以神明稱之居二載適逆瑾用事偶以魏公土田誣連至京縣人爭斂金帛饋瑾贖公公正色曰余爲民獲罪若復斂民以脫余豈非益余罪耶峻却之三年陞刑部主事歷本部員外郎中遂薈楊公陸公水村每言法曹中才能明練必曰李廷重部居三

載陞東昌知府公政先大體事安民安修葺城郭大
建關橋吾郡之人至今誦焉未幾調劇常州甫一載
丁張母憂終制補青州府青有鹽鑛多鉅盜公至擒
其渠魁撫餘黨悉爲良民郡人欲生祠公公曰捕盜
安民有司常事耳何祠焉陞山東按察副使兵備徐
州徐爲兩京要衝有司疲於供億民多逃亡公裁浮
節冗交際悉有定式公自奉尤約往來雖貴公知厚
僅留一飯人亦諒公之廉不以爲慢里甲之困由是
少甦時有大盜王鏜聚衆數萬行劫兗濟公選委調
集指授方畧戎服督陣火賊穴巢遂蕩平焉總督余

公疏其事以聞賜公白金彩幣陞浙江右叅政一年
陞山西按察使公素性明敏剖決如流凡疑獄數年
不決者悉解晉人至今稱思焉陞都察院右僉都御史
巡撫甘肅抵任三月以福建事披逮回京福建事
原公舉晉時所勘也朝見致詞 上深奇公丰采異
常中貴密示 上意曰廷鞠之日若能少順 上意
諒貴巡按豈特脫罪當有不次之擢公笑曰死生榮
辱自有定分臨難二心非君子所爲豈敢欺天以微
軀也獄成謫戍廣西潯州去國萬餘里羈配所十餘
年安人秦氏偕焉安人以疾卒於廣州安人天性貞

淑南成之日慨然如烈丈夫親識有勸安人勿從者
安人曰榮寵富貴每同吾夫今流離患難安忍家居
自適耶聞者莫不嘆服隨行親屬瘳厲而死者自安
人以下十有七人公處之泰然畧無怨色尋蒙恩許
還里居四載爲嘉靖壬寅時大虜闌入鴈門失守畿
甸震驚廷臣交薦召以原職起公提督鴈門等關兼
巡撫山西地方公被命毅然就道至之日督率將領
行視關隘乃陳禦虜事宜及增兵築邊預定戰守之
策上皆嘉納焉遂增叅將四員築邊八百餘里晉
人至今賴之又調選民兵分布要害是歲虜不敢南

犯重書褒獎賜以文綺公居晉一歲夜以繼日無思
運籌寢食俱廢而公之精神已少憊矣引疾乞歸
上不允溫詔褒答公感泣力疾視事再踰月疾增劇
乃溼紙懸疏 上鑒其忠誠許暫還尋醫仍俟後命
抵案又四載爲戊申遼左不靖 上復起公公至遼
增築屯堡奏調河間青州之技卒添募錦義寧前之
兵馬選用土人之精壯區措大備戊申冬召爲大理
卿時方候代大虜數萬入寇虜意以公將行不復設
備不知公於總帥協謀備預已萬全已遂進督諸路
兵馬嚴申號令設伏扼險鏖戰累日得虜首一百五

十馬三百二十虜器倍焉遼人謂二十年來斬獲未
有如斯之盛捷至 聖心大悅廷臣方議行賞而爲
勩者所熱功遂不錄公在遼雖未久值大虜內侵兵
食之資禦攘之器非晉無事時比也雖力致膚功之
奏而公之精神又非居晉時比也以是到任未期月
遂上疏乞骸 上允之賜致仕嗚呼向使公疾未痼
久任棘卿雖漢之釋之唐之戴胄其何能加胡公歸
田未久一卧不起惜哉

大理寺卿李公香行狀

傳 列

公諱香字汝蘭別號澗山世居分宜之曹溪公生穎敏端重甫五歲卽就塾丙子領鄉薦庚辰中會試辛巳以進士拜都水主事管徐州洪洪近例每民船一納錢十半入官半入夫公痛革之適荒疫賴仍人相舍公多方措糴又勸諭富民周潭等出粟斷粥賑活內外饑民又錯銀買藥剗置衙前井中令人得自汲疫者以甃其死而無歸者又措銀買民間無碍地安瘞之各碑識其上又查出近洪官地可耕者區區成成立義倉四爲永遠備荒計徐人至今德之三載

轉刑部擢廣東高肇兵備僉事高肇素苦徭夷焚市
殺官甚至械兵憲曹於山中公計縛其渠魁趙了木
等又計掃大臺尖底兩岡又計熾廣西石州靖山寨
五載之閒奇績甚多以妣訃奔歸乙未服除補山東
三月擢山西按察司副使正儀賓殺兄之獄獲吐虜
首級百餘威名丕振以考訃奔歸庚子服除補曲靖
兵備控福建叅政未幾擢山東按察使已又擢廣西
布政又轉左轄勵廉正嚴閑防清吏胥慎出納風望
崇茂地方倚重獨靖江府汰侈恣肆不可悅化公乃
究其非法懲其尤盛又清復其混擾界地遂致誣臣

之秦禍且叵測賴今上聖明加察當道公論保持
無恙未幾巡按徐公南金有特薦之疏焉戊申年十
月奉簡命進都察院右副都御史巡撫四川諸所興
革張弛彰瘴激揚輿論咸宜之蜀王亦深加愛敬歲
餘進大理卿各方物噍儀及水手諸名色咸峻却之
至瓜州有都蠻距城數百里其酋長偕部下數百人
以彤鎗鐵劔及時傳諸莛銅鼓來獻用表歸化之志
公命官屬以冠帶員領授其長十二人因教之以禮
拜又示之訓子弟尚禮義服貢賦之畧諸蠻欣抃叩
謝而去至荊州忽得瘋疾坐稽謝謝之期遂諧肥遯

之計時辛亥年七月也公歸怡然自得佳山勝水樂
是卽往非禮節不人有司門晚居郡城不以一木一
石累鄉人尤篤孝友事二叔棧杰如父嘗做呂氏鄉
約以風族里又間合族中弟子考德規過有美善隨
志者獎贊勸成寔甚者給資公生弘治甲寅三月五
日年六十三

大理寺卿余公胤緒傳

胡直

余胤緒應城人登嘉靖丙戌進士授南京戶部主事
監所策浦口諸倉會計允當大司徒雅重焉戊子秋
同考應天鄉試秉公得名士銓部嘉其錄文卽調吏
部稽勲主事歷陞考功郎中承行六年考察之典且
留意人才考註臧否黜陟甚明不奉要重以不題互
糾新例編管九年闕建書舍聚徒訓講甘處澹泊絕
跡公門屢經輔臣臺諫交薦庚子復吏部題覆不應
互糾新例正是恪遵成憲起補南考功郎中考察執
法甲辰春陞南通政司叅議因母病足三疏告歸以

便養親俱未得允乙巳母痊始赴任七月入貢事竣
領請命封親迨母捐養執喪中禮朝夕奠後卽解冠
衰以調父雖畧從吉而哀未少忘也後兩臺交薦庚
戌春補南通政原職是夏陞南太僕少卿至冬轉北
時北虜入寇旣退上將大興六師捷伐之所急在
馬留心牧養得廐馬數萬以濟辛亥春陞南太僕卿
冬陞南大理卿明啟刑書夙夜詳審務使適中凡廷
獻有疑與條案相議必執法求生雖秋部都察或不
敬而其辨益明民自以爲不冤壬子秋又輪入賀事
被轉大理寺卿會足病偶發謝恩之晨進御道趨馳

不及因乞閒住得歸感恩泣下家居惟樂清虛訓第
與子而已自壬子至乙丑十有四年年高德進聞久
望隆屢經公卿臺諫交薦二十餘疏迫上用人圖
治之典將行而遽以疾卒是爲嘉靖乙丑九月十六
日也

大理寺卿龍池張公夢鯉墓志銘

廷尉公少從塾師遊著聲諸生間乙卯舉於鄉丙辰成進士歷戶部兵部尚書郎擢開封府尹公之爲開封潔廉強力不事權貴人權貴人銜之久之乃遷備兵靖邊晉山西叅政江西山西藩臬使率皆用久次遷又久之乃拜都御史巡撫順天再撫甘肅也尋守大理寺卿貴重矣遂謝病去蓋公於近世功名之際稱完節篤行君子云公爲人廉治有大節任事多遠畧郎兵部時屬蒲州楊襄毅公爲尚書每諸郎前白事顧獨目屬公謂是夫足當大任以故權開封公治

明於首種棘人不藉名者累千人晨起坐堂上詢決
立就彼胥無所緣爲奸郡故饒財賦賦所有奇羨更
初不知公則前白是故事以佐公需公怒令笞之悉
附傳入歲會中邑令進銀贖公笑曰乃公無用爲也
悉徙實慶原有大盜禱於獄閭兵來赴援者匪牆外
不敢動公起手劔而入曰敢後者死衆擁入盜皆伏
誅初靖邊議貢市文武吏多不廉察失虜心不者以
漢財物噴虜恣從之名曰鞞廩公至立畫機宜卽市
糧充市實不至費縣官一金事聞歲賜金有差而諸
邊時方事虜顧虜至輒憂芻粟公憤悉摘發乾沒者

於法邊庫悉清虜之盟也議者謂吾且以其暇修守備乃盟日久備日益弛卽功令與斬首虜同功多用虛文相冒無實者公所築鎮邊新障百二十里蓋至今稱雄邊起學官親爲邊人師帥彬彬比內地治晉田賦卽無論晉以無逋負所條官會之議盪積受輸諸轉置惟隸役任歲省富民數十萬計至今天下郡縣效其法蓋公獨用實心故所舉利便率世世利天下稱便按察豫章取訟師訊得其主名數十人捕治之訟事衰息再治晉爲方 旧屬有鑄錢之役公曰是將與民爲政不可急急則銅騰躍耳授民其柄條具

八事案爲令所鼓鑄文質周郭大行矣順天外備邊
內撫三輔公爲悉裁抑諸不急費歲省徵徭十二萬
已悉取積逋盡白蠲之三輔民大蘇會虜妙蠻寇古
北口遣裨將李如楨等擊破之獲首虜捷聞詔賜白
金文綺東虜土蠻以五萬騎犯遼有詔赴援部裨將
楊栗等擊破之捷聞再賜白金文綺益爵一級而公
亦以是威震諸虜間虜以十萬衆欲窺薊伯薊有備
遂巡不敢入移攻遼公則又赴援遼再破之又再賜
白金文綺而威將軍繼光時爲大將軍守薊公所與
議兵間同異輒瞋目評不下已而公策中將軍則於

然心折也始入守大理卿宣言廷尉與比部御史
共執法耳何知形迹論不當者輒反數月所計千餘
牘大辟囚以羅織下獄者全活甚衆夫世稱救萬重
厚之儒自守有之至涉世不能見功業臨以小威勢
罄折不自勝公平居恂恂不越規範馴爲長者也嘗
封勲飭法制與利便所至成累世業夫樹功業必於
爲厚老成也信矣公之在開封屬新鄭方貴所示風
旨潘臬大夫皆風靡公獨持不下有扶溝令爲新鄭
黨所愬新鄭持重怒待之公力白其無他卒之無以
奪公然公秩滿以治行高第久乃使守邊以靖邊數

中虜新鄭意也又久之江陵相賈保其公無所訕江陵目攝之或謂公宜遜謝公曰吾不能徒步勤遠請若廷尉湯也遂謝病歸爲人嚴重孝友與人交無城府然非公事不一見縣大夫仕宦三十年無異寒素異母弟幼一歲而中憲公沒公悉析腴產付之公塲天子惻然念邊勞加賜祭葬逾常典尤異數云公名夢鯉字汝化號龍池中憲公則公父贈副使公者也公生嘉靖十二年六月卒萬曆二十五年四月享年六十有五

大理卿許東張公鹵墓表

馮琦

公諱鹵字召和河南儀封人世有聞者其最顯爲光祿公諱某生某是爲公父公幼警敏受知於鄉先正後渠崔公浚川王公年二十一舉鄉試凡數上春官不第名日益高至己未成進士除婺源高平二邑令乙丑以治行異等徵拜禮科給事中累遷兵科都給事中庚午晉太常寺少卿辛未遷右通政是年九月拜都察院右僉都御史撫浙江以思母雷太恭人棄官歸戊寅詔守舊秩撫保定諭功加右副都御史陞大理寺卿坐不能事當路左遷南京太常寺卿乞休

歸凡再薦起不果用而稱考終命乃其磊珂大節執
德不回言論風采動天下則雖死猶不死也公以英
毅慷慨多大畧持論侃侃無所避初人為諫議大夫
卽論罷附權倖者二人朝論服其強正值 德宗代
肅公請勤視朝涖經筵廣顧問以隆新政 上嘉納
之今 上甫六齡公引累朝立東宮故事以請已復
上言僕御左右勢易親情易決事易習言習人引覃
吉懷安事奏慎選內臣給事東邸當是時塞上多事
浮議蜩起論者請遣大臣巡邊公疏言責任在已則
易成鈐制冬則相委兵備不九攝以巡撫巡撫不足

攝以總督總督不足攝以巡邊事有難者則互相觀望互相滯格耳以是不果遣官官孟冲以內降有所罪公極言祖宗家法輔臣無不與聞之政法司無不許獄之刑中旨可邀置廷尉何爲疏入衆爲公危之上知公忠諫不罪也內江相請更管制公已見推爲奉常命未下一日猶草疏極言其不可或勸公已遷官矣願少異公曰未拜命則猶諫官也疏入竟從公議管制皆如故自銀臺擢中丞三領節鉞在金陵織坂卒馬應祥在河道獲妖人王後溪在保定修三關險阨數百里保障功爲多大璫馮保在公部中乞

公爲建坊公不許以爲勞百姓力竭士大夫尚不可
況內增耶保目攝之而未發也江陵公每與公談屢
輒前席旣別與公約事可否具以書相聞公益自發
舒引當否無所絀有所薦進及論刺皆獨行其意不
阿相君旨久之漸不能平嗾言官論公左遷南京太
常卿以去嗾乎言之難也當其抵掌促膝自以爲極
知無所不傾竭一語疑而千百語皆疑矣公旣罷凡
未與相君語者皆視眉宇頌功德結相君驩又五年
江陵公卒向之爲正言者久擯田野無復爲持平論
而數年中視眉宇頌功德者皆操戈爲難首用自解

免嗟乎言之難與聽言用人之難也張公雖以朝廷
然始終孤立行一意尋未必直而尺寸無所枉何必
官階乃稱尊貴哉公喜讀古人書遂於理學言動師
薛文清輯薛子名言以自程則其立朝剛正自持非
獨氣勝蓋見理明也公先後分枝禮闈舉士六十人
二為名公卿而山陰王相公用謹正事 明主以道
進退世比之王范兩文正蓋得其師之風烈云先大
夫宗伯亦公戊辰所舉士不佞以通家未學數荷公
謙其大者表諸墓道之石生卒年月子女具誌中不
具載

大理卿宋公儀望傳

王世貞

宋公者諱儀望字望之其先丹陽太守哲從吉水爲
吉水人已又徙永豐定爲永豐人公之曾大父邗鉉
嘗輸粟助邊拜綵幣羊酒之賜里人榮之大父七品
散官魁昂父聞義以公貴贈吳縣令再贈御史公之
爲諸生也歎試於有司輒冠然省試輒屈旣薦卽第
進士爲吳縣令未幾卽擢河南道御史後疾歸復爲
御史御史未幾卽起爲大理寺右丞已落職補知火
陵州未上卽拜霸州兵備僉事亡何起爲大名兵備
副使移監福建軍尋削二秩需次久之補四川按察

命事卽復爲其按察之副使移視福建學政以婦卒
自免歸道遷其省參政卽入爲太僕少卿甫上遷大
理左少卿遂進都察院右僉都御史巡撫南直隸提
督軍務繼儲久之以功遷右副都御史改南京大理
寺卿已轉大理卿有所齟齬乞歸需次里中而公卒
矣公之成進士自丁未以至戊寅論三十載一居堂
一移棧一自免再坐謫再需次而其起家與遷移之
峻且速大畧亦相當公之不出天下以爲非公無可
與任者而及其旣出則躡而肘之必不使其有以自
遂其在下位苟遇一名缺亦必念及公以爲非公不

足當而既遷之後復喻喻皆皆互相指目以踈致累
公蓋公之才識果敏精神煥發足以鼓舞人之觀聽
而特亦一中其忌至於適骨勁挺高論橫溢必不肯
含已而何人之好其忌者與知者錯而爲公屈伸最
後知公者方柄國舉東南腹心之地以委公公亦竭
其力以大有顯見天下方延頸冀公之大用而卒不
勝其忌者公亦老且不起矣嗚呼人耶天耶始公公
矣而其邑人猶少之公不動聲色發擿奸弊如神胥
吏洗手而治念諸區所苦者長賦而長賦所苦者長
運往往破家公倡諸區各出公田以贍之所出田賦

計本受田爲差次卽貴勢無得免者民以不出爲大
入寇餉不計大司農計專官併貴吳舊賦人洵洵且
頌公自郡檄慰之而條處其緩急竄者復矣乃與比
邑合而置義塚於六門之郭禁母得水火葬吳俗幾
變言公假故吳人公創文學書院以祠之與諸生講
道肄業其中後皆出爲名公卿如今魏郡太原二相
國其表表者公無補於法比時時懼情兩造數百人
不給時解去而他所經畫樽節皆出人意表故旣微
而人爲尸事之爲御史時上書論大將軍仇鸞擁勤
兵居肘腋扶虜自重無人臣禮時鸞恃寵驕甚聞者

爲縮舌。上雖內私驚而無以易公寢不下未幾驚死事露僇屍及妻子公意益發舒陳時務十二策爲識者所重出按河東雖持法亡所徇許饒賦簡少事公創河東書院申東越之學以與諸生講習多興起者移疾歸省母病痊復爲御史司大計時公之鄉人宰相有驪子橫而貪公欲糺之不果因論邊事遂及東南而以督臣胡之淫侈撫臣阮之婪荒請攝治之二臣驪子之心膂也以是不說公而會公督視三殿大朝門又中貴人議工直日一銀公不可又欲悉易殿陛石公又不可第易其燧弗堪者而驪子私買人

五千金屬工部歐陽尚書者辟與工專公又不可於
是衆怨最矣公之遷大理丞羸子自以爲公功公盡
所報謝而遂巡引避以請急歸適風雷變宰相欲有
所廢樹及大計吏而尚書遷吏部與羸子比而謀誅
公公之兵備霸州也前是有西寧侯者道其地盜夜
迫之倉皇溺死盡剽其資財詔捕之格甚峻公鉤得
其渠魁悉置於理霸人懼公威神竟公任無竊發者
丞爲畿南輔公請城之最爲堅完又疏豁洪武以來
養馬通稅民大悅其自大名移閩監軍名爲材公而
寔遠之且困以兵事後太宰於公按隄時有所不悅

故也公至闕於大帥威繼光合策破倭鹵斬無算入
與棘事所撰程式義冠一時籍籍稱公有文武材而
計吏之請復下矣太宰修前指必欲斥公以快而考
功郎一儒力持之曰宋某材且法不至斥必斥宋郎
請先斥郎乃止議謫而公方從容遊武夷賦詩歸而
灌園意甚適也屬邊事棘廷薦公者前後十八疏於
是公備四川按察僉事以至復爲副使視福建學政
一以高皇帝卧碑訓諸生而時刻東越理性諸書
製之所以鼓舞振德尤備自是參其省政佐大僕人
理皆不久遷無可見者其撫南直隸九郡則自江陵

張相國居正所謂知公者也公故令吳深職民國疾
苦與吏弊風俗至則一切務爲寬大而於雲間金壇
溧陽豪貴人之匿賦而以重累單赤者亡所檢校諸
郡邑中水公上書請減歲租發儲粟以賑水不火災
足時海警稍解吏士諱言兵而公獨與兵使者王叔
采計益修餘皇練卒伍飭戎器申嚴賞罰亡幾倭果
狎至公遣舟師三覆之於外洋俘斬虜口奪儀器甚
衆公於清濁靡所不揚激而所敦勸尤在忠節會有
解雪靖難死事諸臣公謂金陵其死事所也建表忠
祠聚而祀之公之鄉人宋楊邦乂以不屈女直死江

率其祠與墓在焉而墓且湮矣公行求得之爲置以
樹因故祠趾宮而歲饗薦焉太常卿袁公洪愈國子
祭酒姜公寶皆里居非相國所急而姜尤甚公力薦
之意與左使瑣臣繩公公不顧人以是知公雖以材
見器相國要之不苟爲附誰者坐與御史論鹽盜事
相異同公廷辯不少屈雖入爲廷尉猶用前隙指背
公公所部一郞病狂易嘗闌入交戟肆侮公置弗較
也而郞猶時時毀公偶有中者遂繼及之相公細
其說然猶小停公任以解公遂決意不復出以至卒
海內咸惜之得年六十有五耳公生而磊落感慨有

大人志一日讀未史至秦檜脂岳武穆事掩卷而嘆
贈公怪之對曰令兒生其時不飲血而碎檜首者有
如日又讀唐史裴度傳所謂賊滅則朝天有期賊在
則歸闕無日大嗟泣曰壯哉男子當如此耳謝公謂
公當以名義見效且必能爲縣官致死力公工於學
子業負重名然好習史漢書及少陵氏詩善其言矣
偶從鄉先生聶貞襄公豹所得聞東越良知之旨而
服膺焉東越者故王文成公守仁也公遂游貞襄公
門已又游歐陽文莊公德鄉文庄公守益門貞襄及
兩文莊公皆重公以爲能負荷大事最後印證於故

羅文恭公洪先其詣醇深時方議以文成公從祀孔廟而拘儒或難之公曰是未易以口舌爭也乃著或問一篇反覆數千言大較謂堯舜開道心精一之傳未嘗求理於物裕心於外孔門大學首言明明德明德卽道心之靈覺不昧者然則明明德之功要在致知而訓詁之上乃謂致知者推極其知識是求之物而指之外也文成公指而示人曰致吾心之良知而已是知也孟子之所謂孩提之知愛知敬類子之有不善未嘗不知也然則得大學之本旨而上邇堯舜一之傳者無如文成公公之或問出見者無不爽

然穆十餘年卒以文成公論祀公於學能識其大其
爲人氣豪不帖帖細瑣然內行特純篤贈公有九
公故晚舉能得其心歿而公哭之毀悉其婦家蒙以
營喪葬母太夫人九十矣大會客稱觴爲樂比畢會
人而視省者四五公時已踰艾猶蒸蒸然孺子孫也
所受產室悉以讓諸兄兼爲行履得好田園輒買益
之推而至於三族之親以遠疎者又惟而至於交知
及間左亡不沾公之德以爲恒卒然有凶吉取之若
寄公亦自忘其德於人少喜其邑之陽山以自號有
詩曰陽山稿晚撫吳又喜句曲之華陽蓋哀其詩文

目之曰華陽館集始子子仲兄之次子瑜已而自
子曰瑀曰玘曰珽有女婚嫁皆名族許胡觀察行狀
中

大理寺左少卿胡閏 刑文郡奴

胡閏字松友江西鄱陽人少與吳存何英徐素爲同
志友講業長沙王吳芮祠中以忠義相砥礪太祖
征陳友諒至鄱陽見祠壁題竹詩幽人無俗懷寫此
蒼龍骨九天風雨來飛騰作靈物問祠中人曰此誰
詩對曰里中儒生胡閏陰記其姓名以去後應辟至
上曰此題詩鄱陽廟壁者耶授都督府都事進經
歷建文時以直諫避爲右補闕累進大理寺少卿靖
難兵起與齊黃輩日夜密謀設法防禦遜國後召方
孝孺草詔繼召閏及高翔數人者衰經至哭聲徹殿

上召閏先入諭令更服閏曰死即死耳不可更
上以族誅恐之閏不屈命力士以金瓜擊其齒齒
盡聲不絕 上怒縊之死以石灰水浸脫其皮草實
之懸武功坊卽日籍其家子傳道論死傳慶成邊宗
族夷滅誦成者甚衆女郡奴時四歲其母汪縛就刑
郡奴自懷中墮地一卒提入功臣家付嬖下婢收之
郡奴昏睡夢與父母相持泣覺則抱一猫卧也稍長
識大義髮至寸卽自截去日以灰汗面禿垢不作人
狀苟活二十餘年功臣家不以人畜之洪熙初赦諸
死事者苗裔郡奴得同女輩乞丐歸鄱陽貧無所依

鄉人謗之曰此忠臣女也爭餽遺不絕郡奴所受免
免滿已年五十六而終尚處子也鄉人謚曰忠胤
始嘉靖中提學副使邵銳立祠祀之萬曆二十年
鄉守楊際會都陽尹儲昌祚附祀郡奴於其父間

大理寺少卿薛崑傳

薛崑陝西閩鄉人慷慨負志操有口辯洪武間累官大理少卿革朝特見信任辛巳北兵日南王師屢敗方孝孺草詔令崑賫至燕軍又作宣諭數千紙付崑密散將士使歸心朝廷崑至師說曰上言殿下且釋甲謂孝陵暮卽下令旋師潛邸叱其給已崑不能對左右欲殺之潛邸曰此天子使也釋之謀遂不行京師定免崑死謫廣西永樂初安南國王爲黎季犛所殺其孫陳天平自老耄來歸季犛子荅濟請還上命廣西總兵官都督黃中以兵五千送歸國

香行至片站伏發劫天平崑被虐死

行在大理寺右少卿傅啟讓傳

實錄

行在大理寺右少卿傅啟讓湖廣石首人由進士擢河南按察僉事清慎有爲吏畏民服嘗奏築隄以禦河水上從之就命啟讓董其役農民德之九載考最當陞河南吏民奏乞留之命復原職陞正四品祿尋陞大理寺少卿諫議公平宣德六年六月以督餉浙江還得風疾奏乞致仕從之

大理寺左少卿簡庵沈公榮墓志銘 錢溥

正統己巳秋大理寺左少卿沈公致政歸景泰癸酉
四月九日卒於家距生洪武己未六月年七十有四
公諱榮字民望松之華亭人大父諱德輝爲郡史究
獄賴以平反者甚衆事載郡志父諱易初爲諮議參
軍棄去授徒於鄉清苦刻勵嘗取古今詩關五倫者
爲序以授學者妣顧氏二子長度字民則官至翰林
學士次卽公也初公之父以民則贈翰林院侍講學
士妣贈宜人終以公加贈中憲大夫贊治尹大理寺
左少卿妣進恭人公幼穎敏異常兒八歲通孝經語

五十歲善真草十三父母俱亡兄諱遠成而公博聞
戶讀父書疑難輒走父執所斬釋家貧無情日燃燈
書壁筆力遂大進鄉人長老咸異之卒遺子弟從游
歲致百數公尚垂卹坐上座毅然教之有成法人因
知沈氏之有子矣 太宗皇帝臨御勵精文翰民則
首起官翰林繼召公同事秘閣授中書舍人於時諸
勅填委既視草學士以下班書之解大紳胡光大輩
皆擅名於書者獨公兄弟書 上視之加喜焉民則
統麗莊重公書飄逸迥勁雖自一家而各臻其妙凡
大制作登金石藏簡冊施遠裔者則命書賜二品金

織衣特置象笏金縷公姓名以賜皆與兄同題 太

宗皇帝

仁孝皇后

仁宗皇帝

三聖主則獨命

公公所受賜金幣每歸爲兄壽時兄爲學士公爲侍
讀人識與不識以大小學士稱之而不名兄子藻門
人陸友仁輩皆以善書進授中書舍人一時兄弟叔
任師友並居清密而沐寵賚罕與爲比 宣宗皇帝

臨御賜告歸展墓畢謁故當盛暑徒步不以騎乘鄉
里稱之還朝陞右春坊右庶子秩滿陞大理寺右少
卿 今上卽位遷左少卿贊治尹子誥加贈其父公
事 上以勤慎簡約被顧同一以正對所以受知

列聖寵遇優隆服用珍異晚乃勅於真書惟樂行草
畫出入宋仲溫陳文東而得其三昧戶外求者屢恒
滿殿則與客彈棋賦詩一切世務泊如也甫七十語
藻曰古二疏何人耶遂偕致仕歸歸乃盡出所賜金
營錫老堂於故址日聚親族朋舊燕飲其中性孝友
恨養弗逮每時享墓祭泣如初喪敬兄如父愛侄如
子交友一以誠有過則婉諷冀其能改遇材士務汲
引襟度閭爽邕達不屑屑於細故因自號簡庵詩文
與手輒就諸體克備而得意處多膾炙人口是雖以
書顯而學與行能自植以蔚起聲望於士林

大理少卿仰宗泰傳

仰瞻字宗泰長洲人永樂中以鄉貢進士授虎賁衛經歷遷大理左寺丞正統間宦官王振用事百官多奔走其門時大理卿薛瑄少卿顧惟敬及瞻獨不往會辨蔚州衛兵沈榮冤獄益忤振遂謫戍大同景泰初刑部尚書俞士悅左都御史陳鎰言其以鯁介庸召爲右寺丞持法愈堅在位者多不合遂引年辭歸加大理少卿致仕所著有小學講義歸休集瞻尤篤長者之行有夏時建中者嘗任郡學訓導瞻嘗師之後瞻經其門必下驢趨而過之竊窺者雖暮夜亦然

大理寺右少卿李奎傳

黃佐

李奎字文明廣信弋陽人自少端重淳粹博通經史
永樂辛卯薦於鄉爲廣昌縣學教諭以考最遷國子
監學錄以溫厚化導多士日夕觀覽六經百氏之旨
作爲文章詩歌汪洋浩瀚溫厚典則祭酒陳敬宗見
之噴噴賞異曰一代杰作也正統戊午被薦試都堂
擢監察御史慨然以澄清沙汰爲已任裁斷一切事
情引經援史高出世俗人咸遜以爲不可及嘗奉命
巡歷浙江時戶部侍郎王瀾在浙督運頗失紀律奎
卽劾奏罷之已而巡歷蘇松諸郡奸贓官吏莫不整

勳曰此勅罷王侍郎者也皆望風求解去尋陞大理
寺丞巡撫河南時流民聚衆賴之以安考績遷右少
卿巡撫畿內諸郡所至奸弊肅清未幾改仕卒奎居
官廉潔優於文學屢上章疏切於時政一時士大夫
咸推重焉有集二十卷藏於家子玘登進士第亦繼
武爲監察御史終陝西按察副使克振憲紀有父風

烈

徐正傳

弇州別記

徐正吳江人故業微其父爲人治刀筆詞訟不齒而正少美貌能文人見輒詫恨曰無天耶徐氏生此兒正舉進士授給事中侍英宗左右上愛之嘗撫慰曰勉哉將大用爾然正小人駟騶沾沾亡所以稱上者會英宗北陷虜還遜於南宮正密疏曰太上皇社稷罪人今遇奉非計且下或借爲奇貨者宜有以處之夫爲天下不顧家陛下毋愛此名也帝心難之不下又數載正已遷大理少卿英宗復辟見正勞曰卿故侍吾給事耶日召對賜金帛酒食

亡算而正亦且幸疏毀不發矣會 英宗一日坐便
殿旋風吹文書墮地取覽乃正疏也 帝怒甚連發
使召之至則投疏使自拾正魂奪噤不能對反接
於市併其家籍矣

大理寺左少卿李茂傳

實錄

大理寺左少卿李茂字萼茂江西吉水縣人登正統
己未進士擢大理寺評事己巳陞寺丞景泰初奉勅
考察南京百司風采凜然尋陞右少卿又往南京審
錄重囚多所平反遂調南京大理寺天順初召赴京
進左少卿天順四年十二月齋宿於朝房一夕暴病
卒命所司論祭茂持身廉慎斷獄詳明蓋無媿所職
云

大理寺右少卿劉公慶行狀

馬中錫

公諱慶字本善姓劉氏世爲保定新城人高祖守一
任元爲太常博士曾祖世用元保安州判官祖子欽
父普安永樂間隨王師征討有功朝廷報之以官不
受歎曰吾世業儒以詩書起家安事兜鍪爲也遂棄
歸田里教公讀書公沉毅淵默重信少許可不肯脂
卓世俗少游學河間旣成瀛鄭之士斂手遺奠故常
其鋒遂以爲舉正統丁卯鄉薦卒業成均謁選授河
南道監察御史持斧行郡國威聲四震汗吏解綬於
范滂貴戚斂手於鮑恢有未足多者成化改元兩廣

齊時廷議須命文武兼備御史大司馬白公主遣以
公名奏請以行比至廣賊鋒甚銳騎突永奔樂安城
自守蓋自元戎以至偏裨莫知計所從出公爲之出
奇決勝進三軍而論之曷以溫言責以大義倡勇敢
禁撻掠民間一絲一粟不敢手輒觸而矢石交下亦
不敢輕有動移公曰士用命可以戰矣翌日元戎整
兵而出號令嚴肅部伍齊整器械鮮明賊望風而遁
兩旬間大功遂成公之力居多焉班師之日行李蕭
然以赤子視漢池以文事飭武備戒貴介以張皇分
將士之甘苦懷徂殺詩書儒將之風而不羅馬援

茹明珠之謫朝廷嘉之陞大理寺右寺丞賚予益戶
歲丙申陞右少卿成化己亥九月二日以足疾卒年
五十有八嗚呼公之聞望德業孚於公卿間種種可
述而平廣賊一事尤奇偉撫劔轅門挽弓革車者視
書生以爲易與觀公之行而於稽其類書生果可易
乎

董大理怡傳

黃佐

董大理名怡字世良上海人也其先居汴宋南渡初徙家吳會里世多隱君子至父綸仕爲御史公初領鄉薦入太學爲司成林文安所知歷事承運庫手書進呈揭帖孝宗見其字類沈度欲官之中書左右諭上意公辭乃已弘治丙辰擢進士授工部主事分司徐州洪約束漕舟公私稱便滿考改刑部歷員外郎郎中明習律例有族子二人同毆殺叔母公謂法當叙服制重輕司寇不從擬以同罪果爲大理所反始悔不用公言乙丑九月奉勅錄囚浙江平反死

獄六十餘人減釋徒流以下數十人無不明慎人人感泣至有圖像奉之者事竣還朝時逆瑾干政凡復命者必往謁既不往又無所賂遺大拂其意乃撫公踰限罰米二百石餉邊正德戊辰吏部以歷俸十年已上練達刑名晉大理寺丞又明年庚午始選右少卿時中外多故公兩署冢叅駁明當會審大獄折以片言具得其情吳僉事廷舉被瑾逮繫止坐以枉道陶給事中諧劾瑾請戍庸州家人至都黨禁方嚴公獨周旋其間卒獲保全他多類是凡事涉危疑以身當之以是受知閔莊懿許襄毅二公獨深以奏獻忤

璫意奪俸者屢矣會瑾敗言官謝訥論康修拱黨璫
因及公猥謂驟遷由是落職癸酉七月始上疏畧曰
臣本東海編民材質庸劣遭遇先帝明聖列官郎
署臣待罪工部者三年刑部者八年陛下俯從廷
議拔臣於淹滯之中擢官大理恩數踰分然祖宗
用人著在令甲如臣循資遷轉者蓋常有之而言者
以爲驟方逆瑾憑寵肆虐時罰米奪俸回話待罪挫
辱百至而言者以爲夤緣臣寔寃之臣身為法官既
不能誅討元惡又不能乞身求退罪深責薄放歸田
聖臣復何言但禮進義退人臣之節不可不明乞勅

餘曹敷臣推舉事由明臣心迹以禮致仕俾臣素節
得白於後世卽死無憾矣事下吏部不報辛巳四月
今上卽位覃恩詔以章服閒居茂有薦辟皆辭不
行居常娛情書史意興所到輒發爲歌詩客至惟以
觴奕爲樂不復問人間事嘉靖丁亥八月九日卒年
七十有四子范南雍公子宜陽來受業具狀及太宰
玉岑先生所撰墓碑泣請曰先公浮沉常調晚始一
奮人方謂淹也而乃以驟去一斥不復齋志以沒門
下覈其事而傳之俾托於不朽予於是大書其事云
夫國史考見得失傳信異代乃不盡然予在史館卅

地中
能小
與
右之

賈錄見謝給諫彈事會呂涇野至問對山何如人曰
直節人也致孝於親且篤交誼嘗極空同於死獄然
性度高邁偏偏面斥人短坐是致怨比在留都晤馬
歸田爲余言空同下獄時瑾欲殺之急乃書片紙出
曰對山救我家人往告康康卽上馬馳至瑾門闢不
爲通噤曰我天下魁人也汝公乃我鄉里瑾素聞康
名冀一見不可得聞之卽攝衣迎康康遂上坐瑾留
飲康談笑睨瑾曰自古三秦豪傑有幾瑾愕然曰請
先生教之康曰昔桓溫問王猛三秦豪傑何以不至
猛捫蝨而談世務三秦豪傑舍猛而誰何溫聞若此

續錄

卷之八

十一

設瑾面發赤疑其譏已因問曰於今三季豪傑有幾
康默然屈指曰三人爾昔王三原秉銓衡進賢退不
肖今則有密勿親信秉大鈞者意指瑾也瑾轉發喜
色因復問曰尚有一人其先生乎無謂王猛在前而
吾不識康曰公何謬稱海也此一人乃今之李白海
何能爲彼瑾因問之則曰海不敢道海不敢道昔曹
操憎彌衡假手黃祖殺之奸雄小智也李白所使高
力士脫鞵可謂輕傲力士力士脫鞵而不辭容物大
度也瑾俯首思曰先生豈謂李夢陽邪此人罪當誅
康卽起辭出曰海不敢道者此也瑾謝曰敬聞命矣

明日卽敬出之其後空同反嫉害對山知者至爲中山狼傳刺空同然對山未嘗讎空同也由是觀之黨邪非邪大理之冤可類推已論曰先王慎罰不聞株連諺有之曰弋必有鉞嫌必有匹裕諫儕大理於康子以其倫也予問谿田言愬寘於耳而宜陽述大理孝行縷縷且又天性卞急坦直無他腸絕與康類當逆逆毒薦紳大理必有陰救人不及知者乃得齊名書史稱康董焉辟諸日月相焜耀於無窮嗟乎偉矣

大理寺左少卿半憲羅公幹墓表 呂 楫

公諱幹字質甫姓羅氏號半憲應天江寧縣人廣東
布政司左叅議諱檠者之子也其先浙之秀水人曾
大父文中以間右實京師因籍江寧云大父景伊以
參議公貴贈工部員外郎大母沈氏贈宜人參議公
配魏氏贈恭人二室王氏寔生公者也以公貴封太
播人贈恭人伯兄載仲兄與舉人皆魏恭人出公生
而穎悟過人博覽載籍輒能誦說爲文頃刻數千言
立就年二十一舉應天鄉試高等明年戊辰與子同
舉進士尋授中書舍人己巳之秋冊封益王世子中

道正使逝卒命專節以往比至藩邸諸所舉錯中
度坡事過家省拜二人時參議公春秋高公憇憇不
能去因兼程復命已日上疏懇乞就養得改南大理
寺評事至家三日父無疾而逝人以爲獲奉終爲公
幸云癸酉起復仍補前官己卯擢江西袁州府知府
首重學校申教茂士均定民賦創立圍保悉去勾攝
之擾嚴禁萍鄉之訟繕亭舍以振委候書鄉訓以化
里社或積穀以修城或汰差而教樂於是都御史王
公守仁疏其才猷優於治劇乃改贛州贛當閩廣湖
湘要衝數患囊盜公曰民無樹止奚而不盜爾乃禁

章允費刑除雜差寢兩司之防夫輟各衙門之執事
累銀不充私用社學復舉前規贛中食鹽多出兩廣
私販所販之人歲餽郡吏故不能禁公奏計總制歲
取其利以濟軍務遂以爲制贛郡帖然於是都御史
盛公應期言江西劇郡莫若南昌又疏改守南昌至
郡七月間太孺人疾遂棄官西歸連疏乞休稽遲再
歲於部憐其志亦不爲咎嘉靖丙戌復補南康郡瀕
彭蠡乃創作巨堰水溢舟人堰以避風濤水落則泊
堰下而民居亦賴以安其地省雇夫之銀革牙茶之
弊親訊罪犯吏不能行其奸禁止寫丁冊不能隱其

勞績績農桑男婦雙課信牌定期鄉縣不擾犬以有
益於南康者也巳丑擢江西按察副使整飭饒撫兵
備越七月思母復上休疏未報還家五月而太孺人
以壽終得無憾焉壬辰起復補四川按察副使整飭
建昌兵備未至移山東甫三月擢順天府丞明年癸
巳改大理少卿甲午晉宗室與撫臣構隙上命公
往勸公正國法而體人情復命人皆稱平於是廷臣
益多公之才兩舉節鎮上意廷尉不可無公因留
之嗚呼乃至於長逝哉其歿也少傅大學士任丘李
公哭甚哀戶部尚書梁公材太僕少卿王公以旂御

史謝君少南皆以里人治殮如禮訃聞上諭祭九
卿臺省咸祭奠而公之兄載適至自家乃遷柩還南
公生成化丁未五月十一日春秋四十有九

大理寺左少卿商公爲正墓志銘 陶望齡

隆萬間吾越有材臣二人曰太子少保兵部尚書環洲吳公大理寺左少卿燕陽商公二公者皆氣軒而幹挺膽謀而敢決授之權任皆能批煩決率捍社稷制萬里其用足以見矣而人謂之屯施焉商公諱爲正字尚德少有雋聲然屢試不利舉陸慶辛未進士時年四十四矣由刑部主事簡爲江西道監察御史居三月出按山東已更福建督學畿內遷大理寺寺丞連右少卿攝卿事侍講經筵充廷試讀卷官尋改爲左從始仕至官九列纔十歲珥筆持斧備歷榮要

人謂公材固足致之不謂驟也性敏捷強記多所討
覓言之皆有條貫自爲諸生時固已然及解褐見官
長時輿論事輒爲言往代云何與今時制沿改云何
肇書詳允如宿吏老宦聞者驚服既處憲職所條奏
咸中體要於是執政者稱曰商侍御總鎮材也然卒
以少卿罷歸公按齊魯治用嚴按閩以寬皆有聲績
故事御史更中差滿始專按部而公以部郎新資爲
之諸藩臬大吏意不謂輒能或匿端試質疑事及見
折斷咸相顧失色齊俗多故豪猾相連結長短吏民
號曰鴛訪張仁者其魁也吏固稔知之畏其黨不敢

發公捕得筍殺之一部皆鸞稱商公博虎時膠萊河
役起作者漬齟渾中蠱生於股人情騷然環噪首議
者欲爲變公馳往慰定之會奉詔按驗公上言所穿
處石盡水出且汲且挑工力甚費就令渠成而麻灣
海會泮河各數十里潮激爲溝深不盈尺朝濬夕淤
卽別開一道行且復然恐徒糜財力終無所就又言
倡議大臣乃心存國計願勿以事成毀傷任事者心
疏奏後罷論者稱其有體居山東吏民畏憚如威霆
轟然各在其首及至閩則盡剝銖角爲簡易民得日
入總事往往參問盡得更好良民間曲折狀然持重

未嘗妄發也。福寧衛將暴於軍軍縛之縣旂閉門爲
亂變聞公命亟持檄收衛將以來今不幸而見殺則
亂成收之是紆衆忿而奪其禍柄也已。而果解戍卒
以倭俘白獻公公視狀難曰夫遇敵合鬪至移時卒
無寸創是爲生倭者耶。訊囚因海商其一人解行贖
則途券具在驗之而信悉縱遣之工斧石得古像也
而菴之衆頗集有司謂爲亂也。當大辟者數十人公
以妖言律坐一人而已。龐公尚鷹之按浙江也更均
徑爲條鞭法至是撫閩公謂此善法宜通行閩中然
閩中巨家率搖惑賴公力持乃決民歌思並祠祀之

稱爲顧父商母焉時海寇未靖公疏言綠邊兵寡而
民有戍藉遠方者常苦勾補賚送請自今軍丁當解
送者就補鄰並庶爲兩利疏上報可而先是按山東
時言縣佐楊果趙蛟雖胥史有長民材詔從之以蛟
果爲知縣仕者三途並進與改戍事皆著爲令通行
天下初予從商公暨前禮部尚書程公一甫春坊諭
德張公子蓋同事俞南石先生講業臥龍山中商公
最長博識能古文皆兄弟事之至是同官京師三人
居詞曹而公以臺憲督學畿內爲儒者宗皆用經術
任職人聞而榮之公老膠庠文事優裕所擢士多至

顯名者已從御史久次擢大理方授節鉞而竟罷去
官江陵都政地亟材見公明練善持議論意重之以
爲異日可大任數稱之於朝然知其雅正未嘗以私
屬也公亦自方於職事務遠形跡及江陵敗諸任事
者率以黨附狀見指獨公無絲毫然公與六言輒曰
溪公實知我人亦覆用是重焉公文明洲先生諱廷
試舉嘉靖辛丑進士仕至陝西行太僕寺卿直亮善
文章有官譽允用守黃州著聞母陳淑人公罷歸先
生年八十八淑人八十有六矣鄉人稱之曰大理福
人也曠官以厚親於終既罷喪願治花木有別業在

土城山躬理條蔓驅蠹蝓怡然樂之時舉其胞歎曰
此捕虜手而從事蠲蠹乎子罷禮部歸從公修樓居
會酌酒望山恍然臥龍之游子甫出而公遽逝悲夫
公嘗言其先世自汴徙噪宋學士苟新兄弟四人至
顯官各其鄉曰繼錦人明有勝三教授者徙會稽樊
江村數傳及彪彪生澄澄生公澤有二子長任某府
推官璉次卽太僕少後其姑謝故公生於謝氏而璉
有子舉鄉進士公孫周祚復以禮部第三人知邵武
所謂繼璉者又在茲乎公生於丁亥卒於壬寅年七
十六

大理寺丞鄒瑾傳

作公瑾

鄒瑾江西吉安永豐人洪武中嘗官蜀之重慶後薄游巴渝間與金華王紳相遇于渝紳甚稱其志大才敏議論磊落忠義可嘉與俱至成都成都士皆願交焉尋以薦至京建文中爲大理寺丞靖難師入都城望自殺詔夷瑾族或曰瑾不屈見戮

大理寺丞劉端王高傳

劉端王高皆江西南昌人同建文二年進士同以刑科給事中遷大理丞靖難後坐縱方孝孺息樹陰皆刺鼻死或曰高爲刑部郎中

大理寺左寺丞彭與明傳

彭與明江西萬安人洪武中由貢入太學二十五年
授兵科給事中陞刑部浙江司員外郎建文初陞湖
廣按察僉事尋陞大理右寺丞與明廉勤律已剛毅
敢言敏達能斷北師起擇中朝官知兵有風裁者出
江北背察訪將與明爲衆所推送出淮西至靈璧會
何福戰敗與明被執 文皇縱歸令傳語中朝士與
明漸憤裂冠冕棄官變姓名逝去越數年來歸窮餒
憔悴殆不可識詢其故飲泣不言明日竟遁至死不
復返不知所終

大理寺丞孫君珂墓志銘

丘濬

弘治元年五月己卯予友大理寺丞孫君廷珍卒于家又明年始聞其訃嗟乎廷珍少予六歲乃先予死耶予問君自諱所歸以功名負初心豈意伯陽之術揲端索緒將求以長生然而卒亦死耶嗟乎廷珍進而學儒既不得於人退而學仙又不得於天其命也耶噫命非人力所能移亦非道術所能延于君見之矣君諱珂廷珍其字也登之福山人曾祖志學祖彥斌皆不仕父遇河南布政使君自幼侍布政公官京師稍長隨之官徽州所至交其賢豪其所見聞日以

增益然自負甚大出言肆辯恒欲蓋座人歲丁卯以
禮經領山東鄉薦辛未試禮部不中或勸之卒業太
學君曰人有恒言中科中進士作官作御史吾非此
寧老死不仕也甲戌再試果登進士第擢廣西道監
察御史兩按山西及浙江皆適歲大比君監其事宿
弊頓革行部一尚威嚴凜然人不取犯所至伸冤抑
除姦彙其在山西除大峪杜文翥尤爲奇偉文翥武
斷其邑中人號稱衙虎集羣不逞爲羽翼持有司短
長而魚肉其善柔有觸之者操兵刃弦弓矢肆其毒
無敢誰何邑令嘗因徵租杖里正適病死諸虎昇屍

寘令公座殿令幾死令移文上司輒爲所退不得達
君聞之怒將以計禽之爲彼所先覺走愬于朝君被
逮至京歷數其惡以聞諸虎盡謫戍邊而一邑民害
以除列邑聞風攜手相戒莫敢犯君兩從太將出師
紀功次先荆襄後建州皆著奇勅而在荆襄尤爲人
所得道自昔軍功難於得實若勝而通賞之則勇怯
不分專以首虜爲第則戰方亟又何暇持首報君豫
製皂旗一每戰必躬蒞陣後於馬上持之使獲功者
望旗來獻賊而與左右瞭望必參校得實然後紀之
權貴不得以勢取富豪不得以賄進軍中咸謂自來

紀功者所未有也君前後所與共事者總戎則朱保
國永趙武靖輔督軍則白司馬圭李都憲秉皆信而
若君有所建白設置無不開納而一時平賊定亂之
功君所裨益者居多初大軍追千斤劉至南漳保國
適遭疾衆議欲駐兵以待君奮然曰見賊不殺豈得
爲勇士乃同守土總兵金牌李巡撫王都憲儉分兵
追勦至上原坪軍夜至立營儉從營會日暮非徒營時
兵法名爲天牢胡可立營儉從營會日暮非徒營時
萬一賊來乘之危道也宜速選精銳亟據高阜方整
兵未已賊果至我師有備遂擊走之自是軍中有疑

難事多以質君子斤劉就擒凱還總戎以下各臣一級而君止加一級俸衆爲君不平處之恬然其後有事于建州總戎者聞制憲之平君預有謀必欲得君紀功軍中有事輒以谷訪待其一言以決及其功成衆謂公必大用僅得南京大理寺丞時南京科道橫甚御史所訊囚至大理不敢平反習以爲常君至據法平允一毫無所假借會大理屬有張評事者隸屬吏不服推其非法事君送刑部鞠之御史乃劾君與張俱調外任君出知潞州蒞任未久鄉人孫達者爲藩府教授于以事不從構怨于迨接御史御史不直

之并許御史與君俱謫戍宜府君在宜府會羅織之
風起有誣君與其同謫者有異謀將籍爲功希進用
朝命中貴勸之事得白特旨賜歸田里君歸至邛時
布政公休致家居父子日夕相聚處優游田舍間日
與諸弟講明經旨考究古今而其弟三人者俱以家
學戴記領鄉薦而二人者登進士第珪爲給事中琰
中書舍人璜積進士業以待試一家父子兄弟俱登
甲科海岱之間前此未之有也君自幼精敏通達聞
人有異書百計求之必得而後已皆手自校讐而或
爲之註跋所積多至數百卷經史之外下至陰陽醫

卜之書無所不有然皆詳考而精究之而於兵家尤
所注意恒以謂才不兼文武不足以成大事幸而得
爲御史兩預戰功已微見其端緒矣使用之盡其才
而人不中尼之究其所至必有大過人者然而命止
於斯惜哉

大理寺左寺丞汪公淵墓志銘

馮煥

公生四歲而失母十二又失父卽勵志學問闡德興
震政精于易往從之游躋有得與予同正德庚午鄉
薦竟連第進士出知大名縣有聲調沂水沂水經兵
燹解字殘破公爲之一新土城而易之石會鄒境有
積徒聚衆爲亂公悉捕平之有欲上其事者公力止
之銓司疏公最丙子召拜廣東道監察御史首上四
事曰慎選用以重民牧曰嚴考察以汰不職曰時徵
斂以順民情曰慎清勾以安軍藉切中時務 武皇
帝末年奄豎竊政衆冊窟以爲奸公首按議輔一繩

以法都內肅然會 聖駕北還是以有銀牌彩衣奉
繡之賜尋按河南有守備石堅者世持兵柄有跋扈
之漸首劾繩以法乃以勦除強寇功又是以有白金
文綺之賜時幸臣江彬勢熾甚馳官挾勒常例於河
南有請之帑囊應之者公曰浴望之欲不可填而厭
也有不測請以身受值 今上入繼大統公往迎於
新野卽勸 上亟戮大奸以昭公道以快人心蓋指
彬也禍竟不及而大奸授首矣上午公還自河南
上視太學釋奠先師公侍糾儀會 上以文武大臣
有功戴功賜爵祿有差公曰 皇上天授諸臣能貪

天之功耶乃上疏亟言其不可 上竟以是允諸文
武大臣辭是年公以例得封父如其官母爲孺人及
其妻姜氏故事御史再按歷年多者例內捕不復差
公至是兩考稱最臺中會廣西有猺撞之變方有兵
事擇御史往竟又以屬公公至主行鵬剿之法擇嚮
道授之機宜一鼓搗桑江十三寨巢穴盡斬其首餘
黨悉定乃諭以威信修洛容縣以治之猺獠各感泣
爭致材木助役人以爲得其死力云 上嘉其績擢
大理寺右寺丞提督兩廣都御史姚公謨奏岑猛之
捷謂公按廣西時首發其姦是以又有白金文綺之

賜尋轉左寺丞中外方倚大用公會詔獄波及得賜
冠帶歸田里公既以無罪去乃杜門謝賓客居傍築
小墅檢方藥修譜系吟咏其中居九年爲嘉靖乙未
竟以疾不起

大理寺左寺丞山齋周公鳳鳴墓志銘

顧夢圭

周氏世爲蘇之崑山人公高祖諱璣曾祖諱瑛贈南
京刑部尚書妣張氏贈夫人祖諱紹累贈尚書妣李
氏累贈夫人考諱倫官至兩京刑部尚書卒贈太子
少保諡康僖厚德雅望爲三朝名臣妣丘氏繼曾氏
皆贈夫人祖劉氏封宜人公諱鳳鳴字于岐別號山
齋生有異質暫亂能吐奇語志識如老成人年十六
補邑庠生尋應例入太學沉篤自奮研究經籍正德
庚午領應天鄉薦甲戌登進士高第授刑部陝西司

主事初任監獄卽令吏卒滌括械潔罔室時給飯食
囚類以得所且手錄監獄事宜後悉踵行之自是益
精法律尚書重其材委專閩部中奏牘輕重可否必
經參酌然後允當丙子移疾歸省其祖妣李夫人庚
辰復除本部福建司辛巳秩滿考上上嘉靖癸未遷
本部廣西司署員外郎尋遷本司署郎中奉勅赴江
西勘宸濠逆黨密覈詳慎無一人枉縱給傳往返秋
毫無撻撫按藩臬咸敬服焉甲申秩滿再考上上實
授本司郎中乙酉丁劉宜人憂丁亥服闋復除本部
山東司時公益法曹益久解發剗滯如燭照數計諸

司有重獄疑獄悉取裁于公尚書嘉魚李公承勛風
範嚴峻而知公特深以廣東司事最劇所轄錦衣旗
校彼橫難制乃薦公往視篆數日間理積案殆盡貴
勢莫敢逞然公雖以法律從事而宅心仁厚前後遇
大辟囚必反覆求其生易州上巨盜二人一瘦死一
病且治而誣引者六人公慮二盜死則六人無以自
白乃哺而療之後果獲真盜六人皆得釋其他雪冤
活者不可殫紀戊子李公擢本兵丞薦公調職方公
于等邊擇將夙夜寤心纖悉皆手自記注人莫敢干
以私總戎叅將以下除目一出輿情翕服都督馬永

有將材坐註誤屏廢及廷推邊將公首舉承諸大臣
難之公曰其才不可終廢卽忤時獲譴願以身當之
上嘗命惠安伯提督團營豐城侯協同視事豐城
以侯當先伯奏請改勅下兵部議衆漫無可否公曰
侯先伯者常分也若上所任使則自公以下皆不敢
抗事遂定詔曹諸鎮之建白有關係軍國者李公必
諮詢于公區處悉中機宜一歲中上百餘疏皆出公
手又嘗繪九邊圖以獻欲上知邊隅要害不忘柔
遠攘外之志李公每語人曰職方得周郎吾可坐嘯
矣其相信嚮若此公年勞政蹟屢出人右庚寅春遂

補大理寺左寺丞值星霜示變應制上疏其議處兵
食日止調操以實內地選禁衛以固邦本足衣糧以
節邊軍振紀綱以申軍令又曰寬徵收以紓民困清
解納以懲宿奸定經制以裕國用致中和以感化機
其議興水利曰復專官以圖責成疏海口以導下流
濬支河以修圩岸處長橋以決壅滯均夫役以使貧
民禁侵占以飭豪右 上皆嘉納公志欲有爲于天
下而直道勁節屹然自立京師五年一審錄要囚中
貴銜命至法曹長貳多迎合唯諾而公獨持正論張
少傅汪象宰嘗稱並以氣勢凌人公不爲屈論事多

不協坐此致憾欲傾伺瑕釁中傷公竟無所得矣已
秋御史馮恩論劾請大臣張汪欲傳致之死而公所
擬肆赦詔條復忤其意遂落職以歸居家十有八年
兩京大臣及臺諫撫按薦公可大用者六十餘疏而
晚節益堅絕交當路遂不復徵召沉沮以終其身天
下共惜之

大理寺右寺丞張公鵬墓志銘

大理公諱鵬字鳴南別號漳源晉之汾州人也世業儒曾祖溥爲陝西會寧縣縣丞有遠愛在小民祖顯國子生以文見知于大司成瓊臺丘公密授圖書以待士之前國子竟以故封返公因歎而嘉之復以所著村王遺事贈焉是可以觀大理之源流矣父好古長弘能顏性剛而古朴言行侃侃爲鄉人所推重然累舉不第竟貢太學一時太學之士莫不重其人而樂與之遊後贈公爲江西道監察御史母桂氏爲孺人從于貴也大型之生也蚤有異質在襁褓時贈公

置之勝上口授章句一過輒成誦及歲十五大遂蔚
然有文名寄庵張公嘗以按部至沁見其文而器重
之既而松臯許公柳泉馬公相繼視學皆稱賞其才
因選士之尤者七人入河汾書院而大理實爲之冠
嘉靖改元薦山西鄉試旋丁內艱既免喪乃登丙戌
進士授河南府推官是時大理方弱冠明刑慎獄雖
老吏弗及也甫二年撫按交薦者七乃贈公卒于宦
邸大理自奉之薄幾無以爲斂郡守范君代備棺槨
始克裏事已而再除浙之衢州府大理年益壯政日
益精雖府政旁午而立談剖析莫不允當衝缺守大

理署郡凡八閱月樞按薦之者猶河南也遂徵拜江
西道監察御史卽上經略七邊封事 上覽而嘉納
之十二年按甘肅大理巡歷殆遍其境時承平日久
武備多弛大理乃大加鼓舞較閭激以忠義自是而
軍聲振矣未幾虜犯靖虜安定諸地殘傷者無慮萬
餘將領率匿不以聞大理毅然勅其將官劉文而下
若干人總兵時陳軍士多不堪其殘貪者大理復奏
其狀于 上由是時陳亦復罪秦民快焉雖冒土厚
而費于得水大理令鑿井數十以利民用至今便之
秦州太昊廟壞大理命有司新其堂宇正其祭器十

四年復按山東批答簿書夜分不寐少暇即課試諸
生且於會城立湖雨書院選齊魯諸生讀書習業其
中既擇師儒而督教之又從而躬自履省之丁酉庚
子鄉試果多得人論者莫不知其爲大理之門下云
先是岱嶽香火爲五嶽最甚至師巫鼓舍身投崖之
說大理又立石示禁民始知悟瀕海以東有豪民爲
地方梗者悉置之法蓋數年所未有也膠莒之地多
逃去所遺荒田數百頃悉命開墾集貧民耕之獲利
倍昔若夫正紀綱扶風教節浮費恤筭獨懲貪墨則
又有前人所未及者壬寅掌京畿道並掌諸司庶務

大理稱雄莫有遺者十七年 聖母梓官南祈葬

先皇帝獻陵大理又上疏言大可憂者三時不可行者六事雖未行識者偉之心城舊為漳水所侵者半大理寓書當路並力葺修後虜入境民頗無虞十九年轉官大理右寺丞會審大辟毅然持正無所迴避

上有羊酒之賜朝士榮之蓋履任一年而疾作卽上疏乞歸里遂杜門掃室日事醫藥然大理賦粟素豐頑又積苦公勞者久乃竟莫之起君子以爲壽不稱德位不伸才靡不痛而惜之大理平生博友一世思欲延擢英豪以恢其功業如浚川如涇野如滄泉

諸君則又其石交也明興以來汾以進士起家大理
一人而已所著有貞巡錄桂洲夏公可泉胡公研岡
杜公皆以爲得風人之道意復有諫草及遺文八卷
藏于家生于弘治十五年六月卒嘉靖二十四年八
月年僅四十又四云

大理寺丞成守節傳

成守節字子安號甘齋公生而穎異器宇沖粹兒時
識者謂不凡從從兄孝廉守復讀書求大義不拘拘
章句家貧晏如也中嘉靖己酉鄉試癸丑進士授元
氏縣尹務興學校冀善良平賦清訟不數月而稱治
時大侵鄰境老弱多轉死壯者羣起爲盜公於盜則
殲其魁於貧則撫養之繼以公事入其疆民有隨車
泣下曰是生我父母耶以高第擢監察御史視蘆海
幼部使不職繼巡宣大按武弁奸賊按江西蹙軍餉
改折之弊分宜敗公以天日自誓不少旁及丁卯大

比則慨然負以人事君之義至如匡時弊廣循良清
選法議考課諸疏爲臺省推服而葉奢修正紀綱糾
貪引廉務實斥僞皆設施之大者在江西病甚乞于
告歸尋起爲河南道改京畿陞大理丞隆慶四年時
雷熱審多所平反人方謂公之德當有厚報乃暴卒
於官元氏祀于名宦本州入鄉賢祀之

大理寺左寺正嚴公本傳

張詡

嚴公名本字志道號高菴其先居蘇之崑山巴城里
生再期母趙亡八歲出就嘉定戚氏姑家從素室祁
先生學既冠授父命就居常之江陰邑城北遂占籍
焉舌耕筆耨得粟布躬負歸養父甚樂之張載菴庸
黃友古常齒德望一邑咸爲忘年友題寓舍曰君子
齋父病歸侍藥克謹暨沒哀毀治喪斥釋道教一本
朱子家禮服除益自礪取經書及史籍朱批黑勘期
在躬行以傳後裔復以歷代刑書惟在刑統傳霖雖
括韻語然辭約義博註者弗一題哀諸家言附以已

見著刑統賦輯義四卷載以俟時永樂癸巳 太宗
命廷臣五品以上洎郡邑各舉所知以安養軍民吏
部郎中何君澄薦以堪職風憲江陰令李君進復以
材宜牧民舉明年徵至南京 仁宗在青宮監國事
命吏部尚書寒公義試理人策一篇復舉律疑數條
爲問隨問數答同試者皆授郡邑職獨拜刑部廣西
清吏司主事時掌部侍郎張公本介潔自持鮮有當
意疑獄多俾訊之安慶鄉民七人夜漁于河鄉民舟
未軍衛之功抵以強劫重辟一訊知其寃改以杖徒
政多類是辛丑歲上命尚書宋公禮伐木于西蜀與

輔行選既至保恤軍民事獨先集烏蒙諸號羿子強
獷難化一夕驚疑被甲負弩羣至衆皆懾懼獨挺身
諭以朝廷威德蜜遂帖服自宋公而下悉以爲弗及
仁廟嗣統徵還大理卿虞公謙刑部尚書金公純同
日論薦卽授承德郎大理寺左寺正時法曹斷獄多
以知情故縱及大不敬爲擬持爭之曰我朝定律除
逆叛數條外餘無故縱之文况不敬情罪輕重弗一
庸可槩入重比以失聖朝明慎庶獄意乎虞公黷之
悉爲駁正迄今遵守敷歷旣深清介乎于遠近勅命
馳恩贈父俊如其官母妻俱安人賜白金十兩寶鈔

二百錠歸營焚黃之禮妻郭歿于南京官舍弗再娶

子三人吳文恪公時為監察御史少嘗好琵琶受先君之

教而絕之亦嘗為酒所困感友古黃先生之教而改

為及讀程子制外安內之箴頓然而悟因推類以通

其餘故鄉衛之樂不使經耳靡麗之色不使近目觀

友張宴而聲妓佐酒必毅然起避固挽之亦不留凡

宴享之際以禮酬酢而已思宣聖鬼神敬遠之訓故

至親禱祠之事絕口不道遇他人女婦之寺觀廟宇

者必屢言斥其非或以招怨諾止之則曰吾以名教

為重奚恤人言海隅計嗣有告儀真簿與吏盜官

海隅計嗣
書傳後

麻萬斤已誣服察其冤裂勸麻數不虧特昭雪之徽
州民有室女無夫而娠舅氏詰責之女懼解衣木際
而逸女之母訶弟逼女溺死杖徒馭以屍未獲令檢
尋後于隣邑得其女蓋與人私通以逃始正其罪迫
還徒者

翰林修撰
孫洪著傳

有御史陳旭子與鄉人同飲于

肆俱爲邏者所獲茲鄉人前爲盜劫人事覺而逃餘
竄七人已棄市鄉人既就繫懼拷誣引御史子同盜
且分之贓案具而鄉人死御史子無以自明謬以其
母替珥爲贓公閱案見前七人招服未嘗有御史子
及召事主驗所入贓非其物疑而問之其子號痛稱

寬公將直之同列皆謂成獄久不可改公曰御史子
有寬而不得白執法者能無慙乎乃獨署其案開于
朝而釋之其在大理時良鄉民有失馬疑其隣盜之
執告于縣縣丞亦以爲可疑因拷訊過重而死法司
坐丞決罰不如法當徒而又坐告者以絞公曰因公
殺人罪丞當矣告者因疑而訴豈可坐以誣告致死
哉所擬則似丞與告者各殺一人矣遂駁正而活告
者之死有某衛指揮畜交趾蠻童旣長爲娶目爲養
子後指揮戲其婦不從事覺法司罪以強姦子婦公
駁之曰養子非所生而姦且未成比于內亂有間矣

覆議得減死從流莒州有屯卒奪民田爲其所訟得
罪于按察司卒讐之而無以逞夜盜民家驢以歸民
搜索得之卒反以民爲誣賴擒送千戶孫恭所千戶
與卒于親民被禁勘至司死法司坐千戶以因公徒
罪公曰殺以止殺千戶得生則死者啣冤遂正其故
勘之罪山東人皆快之蘇州衛卒十餘人駕舟運餉
泊河西務夜劫客其中一人爲事主所殺餘黨惡事
覺無以自飾見隣舟有押解人帶兵仗防囚而行者
因謀指押解人劫商財謂其侶往救而被殺擒告于
官皆証服贖其贖疑之曰押解人與囚同舟借使爲

盜囚必知之駭令驗問果得其實遂釋押解人而正
強盜之罪永樂間嘗領部檄督事于宣歙諸郡時部
官出臨州縣者多昧大體為有司所忽有郡守恃京
朝舊職于人罕所敬讓見公獨踧踖而加畏間持酒
餽致餽欲以微覘公意而繼以贊禮公毅却之守退
而嘆曰吾守此郡開貴人多矣清白有持唯嚴公一

人為越府右長史周忱書傳後

奉命督辦太平者非一人公館

不能容則分寓僧寺一日民有懷白金數十兩詣寺
賂能督辦者而誤請志道既見民驚愕欲引却不能
詢之具以實對即日徙寓學舍僧莫知其由自疑有

矣而見遠也怨留且謝過笑曰吾欲就儒者談耳絕
口不與人知竣事去懷金者乃顯言其事時督辦後
期者例罰工作志道不忍急責民或曰獨不慮罰工
乎曰吾已辦矣蓋先寓書其子鬻田爲工作費後監
察御史尹崇高太平還語予繼敷遇太平士人語加
悉蘇益殿上大學士
楊士奇書傳後嘗承工部文移發南直隸夫匹
郡縣具匹名爲籍吏胥緣爲奸匿皆賄者他人不之
察志道閱舊版畫摘戶之匠者發之郡邑不能容其
奸旣發吏不卽遣以稽限例當拘役子姓憂惶曰貧
奈何曰牽馬謁諸市曰不足齋券鬻其田曰柰老何

曰病卽死且略無戚容

送焚前序

大理寺寺副致仕王公教墓志銘

丘濬

公諱敬字惟瞻考諱弼以公貴贈大理寺左評事妣
畢氏贈孺人世以藝田爲業至公始以儒發身甫冠
補邑庠弟子員屢以書經應京闈試輒不偶尋爲有
司勦駕膺貢禮部爲太學生時四明陳先生爲南廡
祭酒學規嚴甚諸生往往有不堪者公獨安然謂衆
曰師道不可不嚴禮當如是也公容止端莊陳先生
一見於衆人中卽表異之諸生有不率教者輒謂之
盍視王某乎一時聲譽翕然六館間歷政省部銓計
居優等授大理寺左評事尋陞左寺副凡內外法司

大小獄來讞者公盡心推究必盡人情合法意常讀
唐書曰宥過無大刑故無小罪疑惟輕功疑惟重與
其殺不辜寧失不經評獄之要無出此數語矣獄有
當公評者輒以數語存諸心亦往往以是語諸同列
會承天門次朝集廷臣議肆赦公條上二事于其長
其一謂律管兵逃者以闌度論罪景泰初徵民壯入
衛逃者輒遣戍邊太重其一謂律毆殺正車旣抵其
人罪又以其家一人代伍今法司不分戲殺誤殺輒
與毆殺同科非律意乞以二事載之詔條頒天下從
之至今以爲比公在廷評中特爲寬恕未嘗曲法徇

人亦未嘗法外人罪爲寺副滿一考卽上章乞休
致時年六十五也家居足不履城市惟歲望闕稱賀
鄉飲一至縣治日課子孫樹藝自給優游鄉間二十
年如一日也自是無疾而卒春秋八十四

大理寺右寺副東嵩李公承芳行狀

弟李承箕

吾兄資稟高生九月以筋畫灰上作上地兩字見蒼
蠅溺糞洞中以杖搔之人問之曰此其地也使其在
盤盂則捷之矣方九歲伯父酒豪公常坐之膝上謂
之曰鄉人孔御史每愛誦衣紫腰金拜彩年今驗矣
兒能如是乎對曰富貴不淫貧賤樂男兒到此是豪
雄兒愛此耳當是時年十四聞者異之稍長遊邑庠
先生長者見所行與言愛且敬之有麻刺僧進貢經
嘉魚數十人晝夜坐宿縣廳勒索銀米縣官不敢誰

何召諸生諭之麻刺僧持刀挺亂擊諸生皆逸兄被
執欲使跪其主僧兄曰以外夷而侮華夏之官托進
貢而冒公家無益之費庫餽外勒要官錢違法固如
是乎麻刺僧懼卽去之提學副使蒲陽嚴公淦者性
嚴刻議論好異批其卷曰楊文定公解學士不足多
也欲使教諸司子弟兄曰不可吾不能以科舉文字
爲人師聞者不樂惡先儒註脚以爲破裂聖經聞
者皆嫉之矣其言曰夫詩書者吾道之迹而已矣必
得知道者以爲之師於是而授人以詩書則詩書於
人庶乎其有益也使徒事詩書亦末焉耳古之時此

學校也後世亦此學校也古之學者爲己今之學者
爲人古之學者爲君子今之學者爲小人也豈學校
之罪哉予觀近代以來害天下之人心者莫甚於學
官害天不之士習者莫甚於科舉率天下士類爲惡
而無所紀極者莫甚於學官必將天下學官一切廢
去之惟天下之守令擇天下有道德之人以爲之於
郡邑之內求老師宿儒而爲之一鄉之善士則師其
一鄉一國之善士則師其一國凡士子之所習者六
德六行六藝以立其本經書以擴其用而經書則惟
原文而已至於力役田畝及錢穀兵甲律令之屬皆

一一完極之而可施之實用焉守令各論其所會之
地卑躬盡禮而訪問之其道成德就者則舉之夫舉
而用不用則在執天下之政者之責也然士之道成
德就者用則行之不用則藏之亦不可以在外者爲
欣戚也有司惟知舉賢才士惟知守道實惟兩得之
他非所計由郡邑而達之國由國而達之天下斯可
矣年三十有七領鄉薦四十一年登進士西涯先生
謂之曰子盍與錢與謙謁閣老徐先生乎兄對曰吾
慙張師德見薄於王旦矣廷試榜出與謙及弟兄列
名同進士出身拜大理評事三年陞寺副懽然曰權

不能救人之死生才不能識時之變正身不能應時
之俯仰負此官矣其言曰當世之達官理得而勢順
勢順而事從官則易矣中世之達官迹徇而理窒理
窒而事逆無怪其官之難矣勢同而理同理達而官
易惟今時則然也評事之職古之士師也今之所伍
諫官也刑可評也事可言也評事之職也今之刑罰
也不中時事之得失亦多矣三年之淹亦何所爲評
事之難爲也謂評事之難爲若昌黎所謂丞之難爲
也夫心與事一則專二則雜專則成雜則敗理固然
矣舉官者人也集事者官也官不負人人常負其官

人負其官官則廢其事吾見亦多矣卽以疾辭歸于
嘗築釣臺于村庄黃公山至是兄奉母太孺人居之
徜徉臺上或兄倡而弟和之或弟倡而兄和之歌以
伯親觴家固貧甚每歲貸食於人雖菜羹麥飯每至
乏絕了無悔意或勸之復仕曰子素無作官才非敢
薄世也湖西義學十四世祖宗儒所建歲久傾圮與
族人修葺之將以教來學者又有六世祖墓見侵於
蒲圻鄰封人于嘗告白沙陳先生先生曰必訟之官
兄曰貧者無托心之助富者有傾蓋之知姑待之子
不能忍訟之憲司而華亭韓公謂人家五世祖墓不

其修曲歸我李氏予甚愧兄能先事覺微也辛酉之
冬十月太孺人卒兄徒步經營葬事冒寒多饑苦竟
以枯羸不起為壬戌五月二十二日距其生景泰庚
午才五十有三兄性達見人有饑寒色多少盡與已
之帶索啜水無毫髮後日計較也成化十四年十五
年湖廣既澇復旱餓死道路者相枕藉乃作為歌謠
數十首當道聞之大發賑貸存活頗多二十三年及
弘治元年大旱自貸邑人穀百餘斛以贍族人不能
遺既而其人適以輸歲辦物料之京兄一一償之兄
名承芳字危卿別號東澗居士十七世祖名璠自南

唐時居嘉魚五世祖名名遠仕元爲諱史曾祖名煥
洪武間奉西蜀鹽課大使祖善教諭叙瑛成以叙父
官贈都察院右副都御史曾祖母熊氏祖母重氏俱
贈太淑人父阜號鷗賓不仕以兄官贈大理評事母
鄧氏封太孺人妾同邑古氏封孺人

大理寺左司事贈太常寺丞林君公黼墓志銘

崔 桐

正德己卯林公以諫南巡被杖卒後十八年公子逢春奉磁江鄉秋官憲狀來乞銘予曰嗟乎吾於公爲同年同進諫被杖公往矣而吾苟存銘其當爲之憶昔南巡詔下先日廷臣諫者已詔廷跪矣公欲諫或爲公危之公曰吾知諫無益默默其能安乎疏入詔獄三日廷杖倍於先諫者公竟以不勝卒嗚呼痛哉公體素廉時寓公署旁所惇惇與一奴俱奴且蓐疾不能職役使若宜隱忍也而奮然爲之旣杖昇歸以

公署不宜殞殞於同鄉鄭秋官源漢所秋官時亦被
杖為力疾治喪事京師人無弗哀公者歎息曰忠臣
忠臣嗚呼時諫者百餘人而在公為尤難其不敢諫
者出門羞澀擁面京城小兒或掄椰之視公為何如
哉公諱公黼字質夫別號石峰少從同里方伯鄭公
學既學於大學士上蔡李公雅愛靜修嘗問處一室
端然誦習飲食不關其家人者三年故其學精通經
傳子史旁及訓詁韻切篆籀前古至於軒素醫家術
靡不探析公性至孝友居父母喪哀毀蔬粥三年跬
步未嘗遠几筵事其二兄甚謹蕭牆之內怡如也中

正德丁丑進士明年授大理寺左評事僅數月廷中
稱平又明年卒公平居訥訥言若不出口而其臨大
事遇大變確然不可拔如此謂非學問之功孝友之
推耶卒二年 今上卽位遣官諭祭贈太常寺丞錄
其子逢春爲國子生有司祠之鄉賢又割廢寺田若
千畝以蒸嘗公公之先世居福唐道山坊既有諱全
者始徙居長樂之僊山至公凡七世矣曾祖惠祖福
皆不仕父節領鄉薦教諭於潛嘉定二學終岐府件
請贈太常寺丞母陳氏有淑行贈安人配徐氏封安
人皆以公死忠故得推恩男一人卽逢春公成化丙

申九月生卒正德己卯四月得年四十四

大理寺左寺左評事贈太常寺寺丞石峰林公

墓表

張岳

正德己卯春正月辛亥武皇將南幸中外洶洶危疑
廷臣交章諫上怒責先諫者跪外廷待五日罪止
來者勿敢諫丙辰行人司奏繼上上愈怒羣粹去
下詔獄翌日大理寺闔寺繼之又翌日工部屬三人
又繼之上讀奏怒如行人司加甚命鎖項械手足
奉廷中五日復繫詔獄待後命是時余備數行人司
同年長樂林君質夫爲大理評事質夫長余十歲稟

素纓紫械出入神氣閒靜無異騎從出人執署也越
四月壬申杖于獄又越五日丁丑杖闕下質夫兩臂
無完肉流血漬街砌竟杖息微微弗續昇至同年刑
部主事鄭君與聚舍送絕就殮焉余時臥瘡不能視
質夫之殮而親見其死狀爲之伏枕流涕累日是夏
六月余謫南京國子監學正便道省視乃攜質夫與
偕行至延平付其子逢春歸葬質夫爲人忠孝沉默
心事瑩明無一不可贊諸鬼神其事親居家孝友恭
儉與人信詳刑謹細不以一字苟喜怒於人可謂賢
者當質夫未死時士大夫知質夫者大率謂其清修

雅飭爲善人而已及其勇於赴義臨死生而志不懼
氣不衰然後知其浩然有烈丈夫之風非止世所謂
善人也黃後峰伯固於質夫分素淺在獄中熟察其
所爲私謂余曰吾取友幾徧天下乃近遺質夫蓋將
委心焉然質夫死未幾伯固亦死天於賢者氣數何
如也今 天子卽位贈質夫太常寺丞遣官諭祭錄
逢春入太學授光祿署丞轉九江府推官陞署正逢
春嘗以墓表屬余久之未能作甲辰冬余撫江西逢
春由九江將之光祿任謁余別復申前請嗚呼同質
夫時諫者百數人械繫詔獄者三十七人死者十一

人自己卯至今二十七年械繫所存二十六人者惟
茶強顏苟蘇而已霜雪雨露無往非天甘苦堅脆萬
物各以共生質受之莫非天之道也於天乎奚尤質
天之全歸與逢春之成立皆可以自信而無憾矣故
書以授逢春使歸刻之石以示後世之欲知質夫者

焦太史編輯國朝獻徵錄卷之六十八終